

Siunnersuummut nassuiaatit

Nassuiaatit nalinginnaasut

1. Aallaqqaasiut

Siunnersuut pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaannut teknikkikkut allannguutininik arlalinnik imaqarpoq.

Pisortanut akiitsut annertussusiisa annikillisinnissaannik ataatsimoortumik ilungersuuteqarnermut ilaatillugu akiliisitsiniartarnermut suliaasaqarfimmi sunniuteqarluarnerulersitsinissat erseqqissaanissallu arlallit siunnersuutigineqarput. Siunnersuutini pingaarnertut siunnerfigineqarpoq suliaasaqarfimmi akileraaruseriffiup akiliisitsiniarnissamut periarfissaannik pitsangorsaanaissaq, tassani innuttaasut inatsisitigut isumannaatsuunerat annikillisinneqarani.

Sunniuteqarluarnerulersitsinissamut siunnersuutit taakkua ilagaat akiliisitsiniartarnermut inatsimmi § 1, imm. 2-p, inatsisit allattorsimaffiannik aammalu inatsisip atuuffissaannut killissaliinermik imaqartup, nutarterneqarnissaa. Kisiannili allattorsimasut sivilunerusumik nutarterneqarsimangillat, tassami § 1, imm. 2-p kingullermik allanngortinneqarnera 2008-mi ingerlanneqarmat. Tamatuma sunniutigaa allattorsimasut atuuttut amigarnerat. Siunnersuummi tamanna iluarsineqarpoq, tassami allattorsimasut atuuttut iluarsanneqarmata, tassani ilaatigut inatsisit amerlanerusut ilanngunneqarlutik. Siunnersuutip tassunga tunngasortaani, akiliisitsiniartarnermut inatsimmi § 2-p annertusitinneqarnissaa pillugu siunnersuummut peqatigitillugu, akileraaruseriffik sunniuteqarluarnerujussuarmik pisortat akiligassiissutaannik akiliisitsiniarnissaa, ullumikkut pisartunit ajornanginnerulersinneqartussaavoq. Ullumikkut akiligassiissutit akileraaruseriffiup tigusai taakku arlallit akilersinniarneqarnerat eqqartuussiviit ikiortigalugit ingerlanneqartarput. Tamatumani akileraaruseriffimmi atortoqarani suleriaatsit isumalluutininik atuuffiusartut akuutinneqartarput, taamatullu eqqartuussivinni isumalluutit killeqartut atorineqartarlutik. Tamatuma saniatigut nunap karsia tamatumunnga atasumik toqqaannartumik aningaasartuuteqartinneqartarpoq, suliaakkiissutinut tamanut eqqartuussivimmut akitsuutitut ilusilimmik.

Sunniuteqarluarnerulersitsinissap ilungersuutigineqarneranut nangissutigalugu siunnersuutigineqarpoq ilanngaatiginnissinnaatitaaneq annertusitinneqassasoq, akiligassiissutit ullumikkornit ingerlaannartumik ingerlanneqarnerulersumik akilersinniarneqarsinnaanngorlugit. Ullumikkut suliaasani amerlasuuni akiligassiissutit atortoqarani suleriaatsit isumalluutininik atuuffiusussat atorlugit akilersinniarneqartariaqartarput. Ilanngaatiginnissinnaaneq sakkussaavoq, ukiumoortumik akileraarutininik utertoortutininik tunniussisoqartussanngornerani, akileraaruseriffiup angusaqarfiulluurtumik atortagaa. Siunnersuutaavoq aamma akiligassiissutinik pisortat akiliisarnerat pineqartunut ilaatilerlugu, sakkussaq taanna annertusitinneqassasoq. Taamaaliornermi

akileraaruseriffiup akiliisitsiniarnermik suliaqarnerata ilaa annertoq ingerlaannartunngortinneqarsinnaalissalluni.

Inuiaqatigiinni nalinginnaasumik, pingaartumillu akileraaruseriffimmi, ineriartorneq ingerlaannartunngortitsinerup digitalinngortitsinerullu tungaanut annertuumik ingerlavoq. Pisortat ingerlatsineranni oqartussanut aallaavigineqarpoq, aalajangiinerni nassiussisup atia allallugu atsiorneq allassimassasoq. Tamatumani atortoqarani sulianik ingerlatitsineq ilaatinneqartarpoq, suleriaatsit ingerlaannartunngortinnissaat sunniuteqarluarnerulersinnissaallu ajornakusuulersittarlugu. Taamaattumik siunnersuutaavoq akiliisitsiniartarnermut suliassaqarfimmi atsiornissamut piumasaqaatip ilaatinnginnissaanut Naalakkersuisut piginnaatinneqassasut. Tamatumani sulinerup ingerlanera annertunerusumik ingerlaannartunngortinneqarsinnaalissalluni.

2. Siunnersuummi immikkoortut pingaarnerit

Kalaallit Nunaanni akiliisitsiniaanermut pingaarnertigut inatsisitigut sinaakktissaq Kalaallit Nunaannut eqqartuussisarnermut inatsimmi immikkoortoq VIII-miippoq. Pinngitsaaliissummik naamassinnitsitsisarneq pillugu maleruagassani taakkunani aningaasanik akiligassiissutinik allanillu piumasaqaatinik akiliisitsiniarnissamut piginnaatitaanerup pingasunngorlugit avitaanera allassimavoq. Tassalu aningaasanik akiligassiissutinik, pisortat suliassaqarfinni akisussaaffigilerlugit tiguneqarsimasuni, tassalu Kalaallit Nunaanni kommuninut aamma Namminersorlutik Oqartussanut, akiitsorineqartunik akiliisitsiniarnissamut piginnaatitaaneq, Naalakkersuisut ataanni akiliisitsiniartartuniitineqarpoq, takuuk § 597, imm. 2, takuuk § 598, imm. 2 aamma 3. Pisortanut akiitsut oqartussamit immikkut ilisimasalimmit, soorlu assersuutigalugu akileraaruseriffimmit, akilersinniarneqartarlutik ilusiliaq, aamma nunanit allanit ilisimaneqarpoq, ilanngullugit Norge aamma Danmark.

Kalaallit Nunaannut eqqartuussisarnermut inatsimmi § 598, imm. 2-mi pisortat aningaasat piumasaqaatai immikkuullarissut arlallit, akileraaruseriffiup nammineeirluni akilersinniarsinnaasai, allassimapput, ilanngullugit inissiamut attartornermut, kiassarnermut, innaallagissamut imeqarnermullu akiliutissamik akiliinissamut piumasaqaatit.

Tamatuma saniatigut piumasaqaatit suut akileraaruseriffiup nammineeirluni akilersinniarsinnaanera Inatsisartut aalajangersinnaagaat, Kalaallit Nunaannut eqqartuussisarnermut inatsimmi § 598, imm. 3-mi inatsimmi tunngavissisoqarpoq. Inatsimmi tunngavissaq taanna pingaartumik pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni atornerqarpoq. Siunnersuummi matumani piginnaatitaaneq taanna annertusitinniarneqarpoq.

Suliassaq akiliisitsiniartarnermut oqartussamut immikkut ilisimasalimmut inissinneqarpat, eqqartuussisarnermut inatsimmi inatsisitigut isumannaatsuutitsinissamut piumasaqaat malittaatinneqartussaavoq. Taamaattumik Kalaallit Nunaanni akileraaruseriffiup, eqqartuussivimmi pisartut assigalugit, ilaatigut pisariaqartitanik atugassaqartinneqarnissaq pillugu

eqqartuussisarnermut inatsimmi maleruagassat (§ 618), malittussaavai. Tamanna isumaqarpoq akileraaruseriffiup akiitsoqartup aningaasaqarnikkut inissisimanagera eqqarsaatigissagaa, tassami inuk taanna minnerpaamik piisaarfiunngitsumik inuuniarnissamut aningaasaatissaanik qimatsivigineqassammat.

2.1 Inatsisip atuuffissaannik nutarterineq

Siunnersuutigineqarpoq inatsisip atuuffissai nutarterneqassasut, taamaalilluni Inatsisartut inatsisai il.il. attuumassutillit, taakkualu allannngortinneqarneri 2008-miilli, kingullermik taamaaqataanik nutarterisoqarmat, akuerineqartut, tassani ilaatinneqalerlutik.

2.2 Pinngitsaaliissummik akiliisitsiniarnissamut piginnaatitaanerit nutarterneqarnerat annertusitinneqarnerallu

Kalaallit Nunaanni eqqartuussisarnermik inatsimmi pinngitsaaliissummik akiliisitsiniartarneq pillugu maleruagassat maani nunatsinni akiliisitsiniartarnermut suliassaqaqarfirmut aammalu akiligassiissutit suut pinngitsaaliissummik akilersinniarneqarsinnaanerannut, sinaakkutissaliipput. Akiligassiissutit akileraaruseriffiup tigusartagaasa amerlanerpaartai, pinngitsaaliissummik akiliisitsiniartarneq pillugu eqqartuussisarnermik inatsimmi maleruagassani toqqaannartumik pineqartunut ilaatinneqanngillat. Taamaattumik akiligassiissutit taakkua aallaaviatigut eqqartuussiviit ikiortigalugit pinngitsaaliissummik akilersinniarneqartarput. Suliap ingerlanera taanna eqqartuussivinnut taamatullu akileraaruseriffimmut isumalluutinik aningaasartuutinillu annertuumik atuiffiusarpoq.

Taamaattumik sunniuteqarluarnerulersitsinissap ilungersuutigineqarneranut ilaatillugu siunnersuutigineqarpoq, akileraaruseriffimmut pinngitsaaliissummik akiliisitsiniarnissamut piginnaatitsineq annertusitinneqassasoq. Taamaattumik siunnersuutigineqarpoq akiligassiissutit maannakkut eqqartuussiviit akuliutsinneqarnissaannik pisariaqartitsiviusartut, taamatut akuutitsiviuunngitsumik pinngitsaaliissummik akilersinniarneqarsinnaalissasut. Taamaalilluni piginnaatitsinerit aamma sullissinernut pisortanit sullississutigineqartartunut (nunaminertamik atugassiineq, containerinik attartorneq, ininik inuussutissarsiorfiusussanik attartorneq il.il.) akiliinernut akiligassiissutinut aamma atuutsilerlugit annertusitinneqarput. Tamatuma saniatigut aningaasarsianik annertunaarlugit tunniunneqarsimasunik utertillugit akiliinissamik pisortat piunasaqaatai pineqartunut ilaaterlugit aamma piginnaatitsinerit annertusitinneqassasut, siunnersuutigineqarpoq.

Akiligassiissutit sorliit suliassaqaqarfinnit akisussaaffigilerlugit tiguneqarsimasuneersut, akileraaruseriffiup akiliisitsiniartartuunit eqqartuussiviit ikiortiginagit pinngitsaaliissummik akilersinniarneqarsinnaanersut, Kalaallit Nunaanni eqqartuussisarnermik inatsimmi § 598, imm. 3 malillugu Inatsisartut inatsimmi aalajangersinnaapput. Piginnaatitsissut taanna siunnersuummi § 2-mi atornerqarpoq. Taamaalilluni Kalaallit Nunaanni eqqartuussisarnermik inatsimmi allassimasut

saniatigut akiligassiissutit sorliit akileraaruseriffiup akiliisitsiniartartuinit pinngitsaaliissummik akilersinniarneqarsinnaanersut, erseqqinnerusumik allassimasunik, aalajangersagaq imaqarpoq.

Siunnersuutip atuunnerani akiligassiissutaasartussat nutaat arlallit akiligassiissutitut akileraaruseriffimmit akilersinniarneqarsinnaasunut allattukkanut ilanngunneqarput. Siunnersuut akileraaruseriffiup akiliisitsiniarnermik suliaqarneranut sunniuteqarluarnerulersitseqataassaaq aammalu eqqartuussivinni isumalluutit allanut atorneqarsinnaalersissinnaallugit. Siunnersuummi isumalluutit atuiffiusumik suleriaaseqarnissaq pisariaarutsinneqassaaq, taamatullu eqqartuussivimmut akitsuutitut aningaasartuutissanik sipaaruteqarnermik malitseqassalluni, kisianni tamanna allatigut innuttaasut inatsisitigut isumannaatsuunerannut sunniuteqarnerlussanani. Kisiannili sunniuteqarluarnerulersitsinissamut siunnersuutit inatsisitigut isumannaatsuutitsinermut pitsangorsaanaassaata tunngavilersuutigineqarsinnaassaaq, taamaaliornermimi suliaassani arlalinni, ullumikkumit sukkanerusumik suliaassat suliarineqartalissammata.

Tamatuma saniatigut § 2, imm. 1-ip oqaasertalersugaaqqinnissaa siunnersuutigineqarpoq, taamaalilluni aalajangersagaq atuaruminarnerulissammat, taamaalisukkullu § 1, imm. 2-mi allattuiffimmut assingunerulerluni. Siunnersuutigisatut ilusiliineq aalajangersakkamik akileraartitsinermut aqutsisoqarfimmit atugaaneranik oqilisaassaaq, aammalu innuttaasunut paasiuminarnerulersitsilluni.

Tamatuma saniatigut inatsisinik aamma peqqussutit tulleriarineq paarlattuanik § 1, imm. 2-mi allattuiffiup ilaanut attuumassutilinnut innersuussissutitut suliarineqassasoq siunnersuutigineqarpoq, taamaalilluni aalajangersagaq naannerulersinneqassammat aamma atuaruminarnerulluni. Taamaalisukkut inatsisini taakkuni innersuussutaasuni siunissami allannuutit taamaallaat sumiiffinni arlalinni pinnagu sumiiffimmi ataasiinnarmi inatsisip oqaasertaata iluarsineratigut taamaallaat pialissapput.

2.3 Aningaasat aningaasarsianit unerartinneqartut atorlugit naatsorsuilluni akiliisarnerit assigiissaarneqarnerisa malitsigisaanik sunniutaasumik iluarsineq

Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata allannortinneqarnera pillugu Inatsisartut inatsisaanni nr. 13, 3. juni 2015-imeersumi akileraaruseriffimmit ingerlanneqartumik aningaasarsianik unerartitsinissamut naatsorsukkanik akiliinissamut killigititaq nutaaq ilanngunneqarpoq. Inatsisartut 2013-imi ukiaanerani ataatsimiinneranni (UKA2013/100) akileraarutitut A-nut aammalu iluanaarutisianit akileraarutitut naatsorsukkanik akiliinissamut piffissamut killigititap kinguartinneqarnissaata akuerineqarnera pissutigalugu allannortitsisoqarpoq.

Kisiannili allannortitsinermut inatsimmi 3. juni 2015-imeersumi, Inatsisartut inatsisaanni § 3, imm. 6-imi aningaasarsianik unerartitsinissamut naatsorsuilluni akiliinissamut § 3, imm. 1 malillugu ingerlanneqartumut aalajangersagaqareenera, sillimaffigineqarsimangilaq. Tamanna

paatsiveerutsitsisinnaavoq paatsoortitsisinnaallunilu, tassami § 3, imm. 6-imi aalajangersakkami 2013 sioqqullugu naatsorsuilluni akiliinissamut killigitat malinneqarmata.

Siunnersuummi § 3, imm. 6 atorunnaarsillugu, taamatut naapertuutinnngitsoqarnera iluarsiniarneqarpoq. Taamaalilluni siunnersuummi taamaallaat sulisitsisut aningaasarsianik unerartitsinissaannut nalunaarutiginninnissamut naatsorsuillunilu akiliinissamut killigititaq, Inatsisartut inatsisaanni § 3 a-mi allassimasoq aammalu killigitat taakkua assingi akileraarutinut A-nut il.il. atuuttut malillugit ingerlanneqartoq, ataasiinnanngusaaq.

2.4 Ilanngaatiginnissinnaatitaanerup annertusitinneqarnera

Tamatuma saniatigut siunnersuut ilanngaatiginnissinnaatitaanerup annertusitinneqarnissaanik imaqarpoq, tassami ilaatigut siunnersuutigineqarpoq akiligassiissutaasartut, ilanngaatiginninnikkut matussuserneqarsinnaasut, amerlassusii annertusitinneqassasut, ilaatigullu ilanngaatiginnissinnaatitaaneq aamma akiligassiissutinik il.il. akiliinernut atuutsilerlugu, annertusitinneqassasoq.

Akiliisitsiniartarneq isumalluutininik atuiffiungaatsiartarpoq aammalu suliap ingerlasarnera pisariulluni, akileraaruseriffimmi suliaassanik suliarinninnermi iliuuseqarnissarpassuit pisariaqartarlutik. Akileraaruseriffiup sakkussatut atorsinnaasaa akuttunngitsumik atorneqartartoq sunniuteqarluartorlu tassaavoq ilanngaatiginnittarneq. Tassalu illuatungeriit marluk (2-t) imminnut aningaasanik akiitsoqarfigalutik aammalu aappaata aappani nalunaarfigalugu illuatungeriit akornanni akiitsut tamakkiisumik ilaannaasumilluunniit akilernerqarneranni piumasaqaatit imminnut naligiilersut, pisoqarnerani. Sakkussaq nalinginnaasumik pigisanut nalilinnut inatsisini ilaavoq aammalu ukiorpassuarni eqqartuussivimmi suleriaaserineqarluni ineriartortinneqarsimalluni. Ilanngaatiginninnissamut piumasaqaat qitiusoq tassaavoq illuatungeriit (2-t) akornanni illugiilluni inissisimaneq.

Sakkussaq ilanngaatiginnittarnermut assingusoq taaneqartartoq ilanngaatiginnissinnaalerneq, pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata atuutsinneqalernerani 1996-imi Kalaallit Nunaanni atuutsinneqalersoq, pisortat akiitsunik akilinngitsuukkanik akiliisitsiniartarnerannut taamaaqataanik sunniuteqarluartumik periaaserineqarpoq. Ilanngaatiginnissinnaalernerme illuatungeriinnissamut piumasaqaat atuukkunnaarpoq, tassami alla illuatungeriit ilanngaatiginnissinnaatitaaneranni ilanngussinnaalermat. Ilanngaatiginnissinnaatitaanerme ilanngunnerme ilanngaatiginnissinnaalerneq taanna ullumikkut Namminersorlutik Oqartussat akileraarutinik utertoortutinik tunniussinerannut killeqartinneqarpoq, taamatullu ilanngaatiginnissinnaatitaanerme ilanngunneq taamaallaat akiligassiissutinik erseqqinnerusumik killilerneqartunik matussusiitinneqarsinnaammat.

Ilanngaatiginnissinnaatitaanerme ilanngunneq taamaalilluni marlunnik immikkoortunik imaqarpoq: Immikkoortoq siulleg tunniussinerit sorliit ilanngaatiginniffiusinnaasut erseqqinnerusumik

killissalerneqarnerannut tunngassuteqarpoq, immikkoortup aappaa akiligassiissutit sorliit ilanngaatiginniffiunissaannut periarfissiiviunerannut tunngassuteqarluni. Siunnersuummi immikkoortut marluusut imarisaannik atuinissamut periarfissanik annertusititsiniartoqarpoq.

Immikkoortumut siullermut tunngatillugu, tunniussinerit immikkoortut allat ilanngutsillugit, ilanngaatiginnissinnaatitaanerup annertusitinneqarnissaa siunnersuutigineqarpoq. Taamaalilluni siunnersuutigineqarpoq, akileraarutininik utertoortut tunngatillugu ilanngaatiginnissamut periarfissat atuuttut saniatigut, pisortat akiligassiissutinik akiliinerannut atatillugu tunniussinerni ilanngaatiginnittoqarsinnaalissasoq.

Immikkoortup aappaanut tunngatillugu aammattaaq akiligassiissutinut tunngasortaani, akiligassiissutaasartut ilanngaatiginninnikkut matussuserneqarsinnaasut allassimaffiat annertusitillugu, ilanngaatiginnissinnaatitaaneq annertusitinneqassasoq siunnersuutigineqarpoq.

Allaffissornikkut sakkussamut pisariitsumut ilanngaatiginninnertut ilanngaatiginnissinnaalernertullu iluseqartumut taarsiullugu atorneqarsinnaasooq tassaavoq, tunniussinernit aalajangersimasunit pisortat ingerlattagaannit (assersuutigalugu akiligassiinerit tunniussivigineqarnerat) taarsiititsilluni akiliisitsineq. Tassani pineqarpoq akiliisitsiniarnermi iliuuserineqartartoq isumalluutitigut oqimaatumik ingerlanneqartartoq, Kalaallit Nunaanni eqqartuussisarnermik inatsit tunngavigalugu ingerlanneqartartoq. Taarsiititsilluni akiliisitsineq aningaasannorlugit ingerlanneqarsinnaavoq taamatullu pigisat soorlu biilit, umiatsiat pigisallu aalaakkaasut taartigitinneqarsinnaallutik. Taarsiititsilluni akiliisitsisarneq pillugu maleruagassani piumasaqaatit arlallit naammassineqarsimasussat allassimapput. Piumasaqaatini taakkunanani siunertaavoq innuttaasut inatsisitigut isumannaatsuunerannik qulakkeerinninnissaq, tassami sioqqutsisumik nalunaarutiginninnissaq piumasaqaatigineqarmat, taamatullu suut taartigitillugit akiliisitsisoqarsinnaanersoq killilersuutinik atuuttoqarluni. Taamaattoq pisuni aalajangersimasuni nalunaarutiginninnissaq pillugu piumasaqaat atuutsinnginneqarsinnaavoq, assersuutigalugu nalunaarutiginninnginneq eqqarsarnartoqanngitsutut nalilerneqarpat imaluunniit akiitsoqartup akiitsuinut matussusiinissamut periarfissat taamaangippat annertuumik ajorseriartinneqassappata.

Tunniussinerni taarsiititsilluni akiliisitsineq sakkussaavoq, ilanngaatiginnittoqarsinnaatinnagu imaluunniit ilanngaatiginnissinnaalernermik atuinissaq periarfissaqartinnagu, akileraaruseriffimmit atorneqartartoq. Amerlanertigut tunniussinerni aalajangersimasuni taarsiititsilluni akiliisitsineq ingerlanneqarsinnaasarpooq, tassami aningaasarsianik, ikiorsiissutinik, tapersiissutinik assigisaannilluunniit tunniussinerni taarsiititsilluni akiliisitsisoqartanngimmat. Taamaattumik akiitsoqartooq ersarissumik aallaaviatigut annikitsumik angerlarsimaffimmini attassisinnaanissamut aningaasasaqartinneqartarmat, tassami taamaangippat akileraaruseriffik tunniussinerup ilaanik taarsiititsilluni akiliisitsivigineqartumik killiliissammat (Kalaallit Nunaannut eqqartuussisarnermut inatsimmi § 618-imi pisariaqartitanik atugassaqartinneqarnissaq). Nalunaarutiginninneq aamma

atorneqanngissinnaasarpoq, tassami amerlanertigut tamanna eqqarsarnartoqartanngimmat imaluunniit akiitsut taamaanngippat matussuserneqarsinnaanngissinnaallutik.

Isumaliutersuutini siuliani pineqartuni ataasiakkaatigut atortoqarani suliassamik suliarinninnissaq pisariaqarpoq, ilanngaaticinninnissamut ilanngaaticinnissinnaalernissamullu sanilliullugu, taarsiititsilluni akiliisitsinissaq allaffissornikkut oqimaatsumik sakkusanngortarluni. Taamaakkaluartoq pisortat akiligassiinermik piumasagaat tunngavigalugu tunniussinerini taarsiititsilluni akiliisitsinissaq periarfissaqartussaammat, taamaattumik ilanngaaticinnissinnaatitaanerup tunniussinerit taakkorpiaat ilaatilerlugit annertusitinnissaa eqqarsarnartoqartussaangilaq.

2018-imiilli kommunit aamma Namminersorlutik Oqartussat periaaseq Prisme atuutsilerpaat, taamaalillutik immikkoortortat tamarmik pisortat ataatsimoorlutik aningaasaqarnermi periaaseq ataaseq maannakkut atorlugu. Tamatuma kingunerisaanik tunniussinerit kommuninit imaluunniit Namminersorlutik Oqartussanit ingerlanneqartut, ingerlaannartumik suliap ingerlanerani akileraaruseriffimmi akiitsunut akilinngitsuukkanut periaatsimut atassuserneqarsinnaapput. Ingerlaannartumik suliap ingerlanera taanna akileraaruseriffimmi isumalluutinik pitsaanerulersitsissaaq, tassami sulisut atortoqarani suleriaaseqarnermiittut akiliisitsiniarnermik suliassamik suliarinnissinnaalersinneqarsinnaammata.

Siunnersuut, akileraaruseriffiup sulineranik sunniuteqarluarnerulersitsinissaq pisariinnerulersitsinissarlu pillugit Naalackersuisut ungasissumut siunnerfeqarneranni ilaavoq. Kommunit aamma Namminersorlutik Oqartussat ilanngaaticinnissinnaatitaanerisa annertusitinneqarnerani, akileraaruseriffimmi atortoqarani suliassamik suliarinninnermi iliuusissanut isumalluutinik atuineq annikillisinneqassaaq, tassani suliap ingerlaneri annertunerujussuarmik ingerlaannartunngortinneqarsinnaalissammata.

2.5 Akiligassiissutip annertussusaanut annikinnerpaaffissatut killissaliussap inatsimmi aalajangersarneqarnera

Tamatuma saniatigut siunnersuut annikinnerpaaffissatut killissaliussamik aammalu akiligassiissutit sinneruttut annikitsut isumakkeernissaannut killissamik, 2021-miilli aningaasanut inatsisini oqaasertaliussatut atuussimasumik, ilanngussinerimik imaqarpoq. Siunnersuutigineqarpoq oqaasertaliussat taakkua najoqqutassami inatsimmi ilanngunneqassasut, taamaalillutik taakkua siunissami aningaasanut inatsimmi ilaatinneqanngissinnaalissallutik.

2020-mut ilassutitut aningaasaliissutitut inatsimmi oqaasertaliussaq, 100 koruunit inorlugit akiligassiissutit tigusaqartannginnissamut Naalackersuisunut piginnaatitsiviusoq, ilanngunneqassasoq, Aningaasaqarnermut Akileraartarnermullu Ataatsimiititaliap akueraa, taamatullu Namminersorlutik Oqartussat akiligassiissutaasa 300 koruunit inorlugit annertussuseqartut tamarmik taamaatinneqarnissaannut Naalackersuisut piginnaatinneqarlutik.

Aalajangiineq taanna taamanikkulli atuussimavoq, tassami ukiumoortumik aningaasanut inatsisini suliaasaqarfimmut 20-24-mut oqaasertaliussani piginnaatitsissuteqarneq sivitsorneqartarmat.

Siunnersuutigineqarpoq annikinnerpaaffissanut killiliussaq aamma taamaatitsinissamut killiliussaq pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni ilanngunneqassasut, taamaalillutillu ukiumoortumik aningaasanut inatsisinut attuumassuteqarunnaarsinneqassasut.

Taamaalilluni siunnersuummi inatsisitigut inissisimaneq atuuttoq inatsimmut aalajangersimasumut nuutinneqarpoq.

Isumakkeerinissamut killissatut siunnersuutigisaaq aqutsinernut, aamma isumalluutininik sipaagaqarnernut iluaqutaassaaq. Akiitsullit aningaasaqarnikkut il.il. atugarisai apeqqutaatinnagit akiliutissanik 100 kr.-nik ikinnernilluunniit isumakkeerinissamut pisariunngitsumik atuutsitsilernissamut piginnaasaqarnissaq pineqarpoq. Siunnersuutip akiitsullit atugarisaannik nalilersuinerit kingornatigut isumakkeerinissaq pillugu malittarisassat atuutereertut siunnersuutip ilapittorpai. Malittarisassanut taama ittunut Akileraaruserinermik ingerlatsineq pillugu Inatsisartut inatsisaanni §§ 53-57 assersuutaapput, tamatuma kingornatigut inunnik ataasiakkaanik nalilersuinerinik tunngaveqarluni isumakkeerisoqarsinnaasarluni. Piginnaatitsinissamut siunnersuutigisaaq pisortani oqartussaasoqarfiit, taakku akiitsullit aningaasaqarnermi atugarisaannik il.il. ilisimasaqarnerminnik aallaaveqarlutik aamma akiligassanut 100 kr.-t sinnerlugit annertunerusunut akileeqqusinermik ingerlataminnik pingaarnersiuinissaannut killiliinngilaq.

Kisiannili taamaatitsinissamut killissamut tunngatillugu siunnersuutigineqarpoq, taanna annertusititami ilanngunneqassasoq, tassami kommunit aamma Namminersorlutik Oqartussat nammineerlutik akiligassiissutitik 100 koruuninik annikinnerusunilluunniit annertussusilimmik akiitsut sinneqartut taamaatissinnaanerannut periarfissinneqarmata. Taamaaliornermi maannamut taamaatitsinissamut periarfissaasoq, aamma kommunit pineqartunut ilaatilerlugit, annertusitinneqarpoq.

Tamatuma saniatigut kommunit akileeqqusissutaannut qaammatisiutini ulluni 14-ini piffissamik akiliuteqarfiunngitsumik ilanngussisoqassasoq siunnersuutaavoq. Tamatumunnga siunertaq tassaavoq kommunimit ataatsimit akileraartitsisoqarfimmut akileeqqusissutitut nassiussamik paarlaassisutut akiliutit kinguartoorsimasut pinerinik killersuinissaq. Taamaalilluni akileeqqusissutinut akiliutaasimasunut akileraartitsisoqarfiup akiliisitsiniarnissaanut aarleqqutaasoq killilerneqarpoq.

2.6 Akiliisitsiniartarnermut suliassaqarfimmi attaveqaqatigiinnermi atsiornissamut piumasaqaat
Sunniuteqarluarnerulersitsinissap anguniarneqarneranut ilaatillugu siunnersuut tamatuma saniatigut Naalakkersuisut akiliisitsiniartarnermut suliassaqarfimmi atsiornertaqanngitsumik, atsiorneq maskiinamik issuarneqarsimasoq assigisaaluunniit atorlugu allakkianik atuutilersitsinissamut maleruagassanik aalajangersaanissamut piginnaatinneqarnerannik imaqarpoq.

Akileraaruseriffik ullut tamaasa allakkanik allakkianillu amerlasoorpassuarnik nassiussuisarpoq. Allakkat taakkua ilai amerlasuut ingerlaannartumik sulianik ingerlatitsisarnerni, IT-programminit, akileraaruseriffimmi isumalluutit sunniuteqarluarnerulersinnissaannut pitsaanerulersinnissaannullu, ikkussorneqarsimasunit, ingerlanneqartartuni, ilaatillugu nassiunneqartarput. Taamaalilluni allakkat akileraaruseriffimmit nassiunneqartut tamakkernagit inummit allanneqarsimasarput. Kisianni allagarpassuit akileraaruseriffimmi IT atorlugu periaatsinit ingerlaannartumik pilersitaasarput. Siunnersuummi piginnaatitsissutip, akileraarutinut suliassaqarfimmi pisartut assigalugit (akileraaruserinermik ingerlatsineq pillugu Inatsisartut inatsisaanni § 56) akiliisitsiniartarnermut suliassaqarfiup iluani allakkat atsiorneqarsimanissaannut piumasaqaammit ingerlaannartumik pilersinneqartut ilaatinnginnissaannut, atorneqarnissaa eqqarsaatigineqarpoq.

Siuliani pineqartut akiliisitsiniartarnermut suliassaqarfimmi, suliassaqarfiup ataatsimoortinneqarneraniilli annertuumik digitalinngorsaaffiussimasumi, pingaartumik atuuppoq. Digitalinngorsaaneq taanna Naalakkersuisut pisortat ingerlatsinerannik nutarterinissamik kissaateqarnerannut naapertuuppoq, peqatigisaanillu akileraaruseriffimmi isumalluutit suliassanut iluaqusiinerpaasussanut atorneqarnissaat qulakkeerneqassalluni.

Akileraaruseriffiup nutarteriffigineqarnerani aamma digitalinngortitsivigineqarnerani akiliisitsiniartarnermut suliassaqarfimmi suliat ingerlasarneri arlalippassuit ingerlaannartunngortinneqarput. Tassani suliat ingerlaneri, aammalu annertunerpaatigut inuk atilik akuutinnagu ataasiakkaatigut isummerfigineqartariaqanngitsut, siusinnerusukkat atortoqarani aammalu isumalluutini annertuumik atuilluni isumagineqartarput. Suliat ingerlasarnerini taakkunani amerlasuuni ilanngaatiginninnissamut allakkatut, akiliinissamik eqqaasitsinertut, suliami pineqartumut tusarniaanertut assigisaattullu ingerlanneqartarneri ilaatinneqarput. Ineriartorneq taanna inuiaqatigiinni kalaallini sumiiffinni allani, aammalu nunani allani sanilliuttakkatsinni annertoorujussuarmik takuneqartartoq, ukiorpassuarni suli ingerlaannartussaavoq.

Oqartussat suleriaasiinik ingerlaannartunngortitsisarnerup annertusiartornera taamaalilluni pisortat ingerlatsineranni nutaaliaasumi ilaalluinnarpoq, tassani pisortat isumalluutaat tamatumunnga taarsiullugu suliassanut ingerlaannartunngortinneqarnissamut naleqqutinngitsunut atorneqarsinnaalissallutik.

Inatsisissatut siunnersuummi sunniuteqarluarnerulersitsinissamut tassunga iluaqusiiniartoqarpoq, tassami allakkiani ingerlaannartunngortinneqarsinnaasuni atsiornissamut piumasaqaatip

peerneqarnerani akileraaruseriffimmi isumalluutit allanut atorneqarsinnaalissammata. Taakkua tamatumunnga taarsiullugu siunissami innuttaasunik ilitersuussinermut atorneqarsinnaassapput.

Inatsisitigut isumannaatsuutitsinissap, atsiornissaq pillugu piumasaqaammut tunngavigineqartup, mianerineqarnissaanik ajorseriartitsinermik siunnersuut kinguneqassanngitsoq naliliutaavoq. Mianerisassat taakkua ilaatigut tassaapput, allakkat suminngaanneerfiat inummut akisussaasumut tutsinneqarsinnaassasoq, ilaatigut suliaq sulisumit suliamut attuumassuteqarpallaanngitsumit suliarineqarsimassanersoq takunissaanut innuttaasoq periarfissaqassasoq, ilaatigullu oqartussat sulinermi akisussaaffimmik inissiisinnaassasut. Naggataatigut atsiorneq missingiutip aammalu allakkat inaarutaasut assigiinngissutaattut isigineqartarpoq.

Allakkat ingerlaannartumik pilersinneqartut suliassanik suliarinnittartup sunniuteqarfiginngisaanik pilersinneqartarput, taamaattumik suliamut attuumassuteqarpallaarnerup aammalu sulinermi akisussaasuusup mianerineqarnissaa, allakkat inummit allanneqarsimasuuppata siunertarineqartartut assinginik siunertaqaratik. Taamaaqataanik allakkat ingerlaannartumik pilersinneqartut missingiutitit ilusilerlugit nassiunneqarnavianngillat.

Qanoq pisoqaraluarpalluunniit oqartussaq atuutsitsilersoq allakkanut nassiussorneqartussanut ingerlaannartumik allaganngortinneqartunut akisussaasuusaaq. Tamatuma saniatigut allakkat taakkua ilitersuissutaasunik allannertaqassapput aammalu attaveqarfissanut paasisutissanik imaqqassallutik, tiguisusapp ilitersuisussarsiffigisinnaasaannik.

2.7 Namminersorlutik Oqartussanut ikaarsaarnerup kingorna inatsisip oqaasertaannik nutarterineq

Siunnersuut tamatuma saniatigut pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata teknikkikkut iluarsineqarnerinik arlalinnik imaqarpoq. Namminersornerullutik Oqartussaniit Namminersorlutik Oqartussanut ikaarsaarnerup kingorna sullissiviit oqartussallu arlallit taaguutaat allanngorput. Kisiannili tamanna pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni allanngortinneqanngilaq, tamannalu matumani siunnersuummi iluarsineqarpoq.

2.8 Inatsisitigut pisinnaatitaasunut pineqaatissiinissamut aalajangersakkat nutarterneqarnerat

Siunnersuut Inatsisartut inatsisaanni inatsisitigut pisinnaatitaasunut pineqaatissiisarnermut aalajangersakkat nutarterneqarput, taamaalilluni tassani inatsisilioriaatsimi malittarisassat atuuttut naammassineqarlutik. Taamaalilluni teknikkikkut oqaasertaliinermi allanngortitsineq, suleriaatsimik allanngortitsiviunngitsoq, kisimi pineqarpoq.

2.9 Akiliutissanut ikittunut akitsuutit pillugit aningaasanik ingerlatsiviusartunik isumaqatigiissutinik atsiuinissamut piginnaatitaaffigisap atorunnaarsinnera

Akileeqqusarineqartunut akiligassanut akileraartitsisarfirmut akiliutissanut ikittunut akiliinermut akitsuusersuineranut tunngatillugu piginnaatitaaffeqarnermut malittarisassap atorunnaarsinnera siunnersuummi aamma ilaavoq. Malittarisassap 2007-imi atugaalersinneqartup assorsuaq piviusuni aqunniarnerata ajornakusoortupilussuuneranik paasisaqarfigineqarsimavoq, taamaattumillu piginnaatitsissutaasoq atorneqarsimanani.

Tamatuma saniatigut tamatuma kingornatigut niuffaffimmi akiliisarnermut iluarsissutinik arlalinnik, akeqanngikkunik atugaanissaat akikitsuaraasunik takkuttoqarsimavoq. Internetimut pitsanngoriartuaaginnartumik aqquteqarnerup innuttaasunut aamma suliffeqarfinnut suli amerliartuinnartunut netbankikkut akiliteqarnerit siammarternissaat periarfississimavai, taamaalillunilu allakkerisarfik aqqusaaqqaarnagu akiliutinik isumaginninnissamut periarfissiisimapput.

3. Pisortanut aningaasaqarnikkut allaffissornikkullu sunniutaasussat

Naliliutaavoq siunnersuut nalinginnaasumik pisortanut akiitsunik akilinngitsuukkanik annikillisitseqataassasoq, tamannalu peqatigisaanik kommunit aamma Namminersorlutik Oqartussat akiliisinnaassuseqarnerannik pitsanngorsaassasoq. Akileraaruseriffiup akiliisitsiniarnissamut piginnaatinneqarneranik annertusititsineq aammalu ilanngaatiginnissinnaatitaanerup annertusitinneqarnera, akileraaruseriffiup akiliisitsiniarnermik suliaqarnerata ingerlaneranut atatillugu allaffissornermik oqilisaassapput. Taamaaqataanik atsiornissamut piumasaqaatip ilaatinneqannginnera akileraaruseriffiup sulineranik sunniuteqarluarnerulersitsissaaq. Kisiannili suliniutini taakkunani aningaasaqarnikkut iluanaarutissat aalajangersimasut naatsorsorneqarsinnaanngillat. Tamatumunnga taarsiullugu iluanaarutissat pisortanut akiitsunik akilinngitsuukkanik sunniuteqarluarnerusumik akiliisitsiniartarnertut ilusilimmi atuutsinneqalissapput.

Siunnersuut akiliisitsiniarnermik suliaqarnerup tunngavissinnissaanut akileraaruseriffimmi IT atorlugu periaatsinik atuutereersunik iluarsinissamut ineriartortitsinissamullu aningaasartuuteqarnermik malitseqassasoq missiliuutigineqarpoq. Tamatumunnga ineriartortitsinermut aningaasartuutit 250.000 kr.-t tungaannut annertussuseqassasut missiliuutigineqarpoq, tamannalu nammineq toqqammavigisap iluaniitinneqarsinnaavoq.

4. Inuussutissarsiortunut aningaasaqarnikkut allaffissornikkullu sunniutaasussat

Siunnersuut inuussutissarsiortunut killilimmik aningaasaqarnikkut sunniuteqassasoq naatsorsuutigineqarpoq, tassami sunniuteqarluarnerulersitsinerit aamma akiliisitsiniarnissamut piginnaatitsinerit annertusitinneqarnissaat siunnersuutigineqartut, akiitsulinnut tamanut akileraaruseriffiup akiliisitsiniarnermik suliaqarneranut sunniisussaammata.

Ilanngaatiginnissinnaatitaanerup annertusitinneqarnera aalajangersimasumik annertussusilimmik inuussutissarsiortunut sunniissasoq naliliisoqarpoq, tassami taamaaliornermi ilaatigut inuussutissarsiortunermut suliffeqarfinnut akiligassiissutinik akiliutissanik tunniussinerni pisortat ilanngaatiginninnissamut periarfissaat annertusisinnaammata. Kisiannili naliliisoqarpoq inuussutissarsiortut siunnersuut pissutigalugu malunnaatilimmik allanngortitsineq malugissanngikkaat, tassami siunissami ilanngaatiginniffiullutik pisartussat, ullumikkut tamatumunnga taarsiullugu pisortanit tunniussinerni akiliussigallarnertut pisarmata.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut imaluunniit pinngortitamut sunniuteqassanngilaq. Siunnersuut aamma innuttaasut peqqissusaannut tunngatillugu sunniuteqassanngilaq.

6. Innuttaasunut sunniutaasussat

Akilaraaruseriffiup akiliisitsiniarnissamut piginnaatitaanerani annertusititsinissamut aamma ilanngaatiginnissinnaatitaanerani annertusititsinissamut siunnersuut aallaaviatigut innuttaasunut annertuunik sunniuteqartussaangillat. Taamaattoq allaffissornikkut sulianik ingerlatitsinerit oqilisaavigineqarneranni, pisortanut taamatullu innuttaasunut kalluarneqartunut akiliisitsiniarnermik suliaqarnerup ingerlasarnera oqinnerulersinneqartussaavoq. Taamaattumik innuttaasut pisortanut akiitsullit, nammineq kajumissutsiminnik imaluunniit pinngitsaaliissummik akiliisitsiniarnissaq siunertaralugu, akilaraaruseriffimmit attaveqarfigineqartarnek misiginerusalertussaavaat.

Inatsisini atuuttuni piumasaaqatigineqarpoq akiliisitsiniarnermi eqqartuussiviit annertunerusumik akuutinneqartassasut. Tamatuma malitsigisaanik eqqartuussivinni isumalluutit, suliassanik suliarinninnerni piffissaq sivisuujusarluni suliassaqarpallaareersut, annertuumik atorneqalertussaapput. Taamaattumik pisortanut akiitsunik akiliisitsiniarnermut suliassanik suliarinninnermi piffissaq atorneqartoq, siunnersuutip atuutilernerani sivikillisinneqarsinnaassaaq, tamannalu innuttaasunut aamma iluaqutaasussaavoq. Kisiannili allannguutit taakku aningaasaqarnikkut sunniutissai missiliorneqarsinnaangillat, tassami tamanna annertuumik nalorninartortaqqarmat.

7. Sunniutaasussat annertuut allat

Siunnersuut allanik sunniuteqassanngatinneqanngilaq.

8. Oqartussanut kattuffinnullu il.il. tusarniaaneq

Siunnersuut 15. aprilimit 14. maj 2024-mut soqutigisaqartuni makkunani tusarniaassutigineqarpoq:

Avannaata Kommunia, Kommuneqarfik Sermersooq, Kommune Qeqertalik, Qeqqata Kommunia, Kommune Kujalleq, Nunatsinni Advokatit, SIK, Sulisitsisut, BDO, Grønlands Revisionskontor, Deloitte, EY, GrønlandsBanken, BankNordik, ASG, IMAK, AK, Naalakkersuisut Siulittaasuata Naalakkersuisoqarfia, Naalagaaffinngornissamut Nunanullu allanut Naalakkersuisoqarfik,

Aalisarnermut Piniarnermullu Naalakkersuisoqarfik, Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoqarfik, Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik, Peqqissutsimut Naalakkersuisoqarfik, Nunalerinnermut, Imminut Pilersornermut, Nukissiutitut Avatangiisinullu Naalakkersuisoqarfik, Ineqarnermut Attaveqaasersuutinullu Naalakkersuisoqarfik, Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfik, Meeqqanut Inuusuttunullu Naalakkersuisoqarfik aamma Aningaasaqarnermut Sulisoqarnermullu Aqutsisoqarfik.

Siunnersuut tamatuma saniatigut piffissami matuma siuliani taaneqartumi tusarniaavimmi pissarsiarineqarsinnaasimavoq.

Tusarniaanermut akissutini tiguneqartuni immikkoortut pingaarnerit ilanngussat 2-mi matuma kingulianiittumi eqqartorneqarput oqaaseqarfigineqarlutillu.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Siunnersuutigineqarpoq inatsisip qulequtaa, pisortanut akiitsunik akilinngitsuukkanik akiliisitsiniartarnek pillugu Inatsisartut inatsisaannut, allanngortinneqassasoq. Taamaattumik inatsit siunissami Inatsisartut inatsiserissavaat. Tamatuma saniatigut siunnersuutigineqarpoq pinaveersaartitsineq qulequtaata allannerani ilaajunnaarsinneqassasoq.

Nr. 2-mut

§ 1, imm. 1

Siunnersuutigineqarpoq, inatsimmi oqartussat taaguutaat Namminersorlutik Oqartussat atuutsinneqalernerisa kingorna atorneqartunik nutarterneqassasut. Tamatuma saniatigut aalajangersagaq nutarterneqarpoq, taamaalilluni inatsisilioriaatsinut malittarisassat suleriaatsillu nutaanerpaat tassani malinneqarlutik.

§ 1, imm. 2

Siunnersuutigineqarpoq, aalajangersagaq atuuttoq nutarterneqassasoq, taamaalillutik ataasiakkaatigut inatsisinut innersuussinerit inatsisinut atuuttunut tunngatillugu eqqortumik takutitsillutik.

Tamatuma saniatigut siunnersuutigineqarpoq, allattorsimasunut inatsisit nutaat arlallit ilanngunneqassasut, arlallit kingullermik 2007-imi aalajangersakkap iluarsineqarnerata kingorna akuerineqarsimallutik. Inatsisit taakkua akileraaruseriffiup akiliisitsiniarnissamut periarfissaannik pitsannorsaaniarluni ilanngunneqarput.

Siunnersuummi allattukkat iluarsineqartut makkuninnga allannguutinik ilassutaasunillu imaqarput:

Allanngortinneqanngitsut:	Nr. 1 – 7, 10, 11, 15, 22
Allattukkani inatsisit nutaat:	Nr. 9, 12, 19, 26 – 42, 44, 45-49
Inatsit taamaaqataa nutaaq, normua taamaaginnarluni:	Nr. 8, 13, 14, 16, 20, 21, 23-25
Inatsit taamaaqataa nutaaq, nutaamik normoqarluni:	Nr. 18→17-imut
Atorunnaarsinneqartut, taamaattumillu allattuiffimmit peerneqartut:	Nr. 9, 12, 19 (normutoqqat)
Inatsit taanna, nutaamik normulik: 21→43-mut	Nr. 17→18-imut, aamma

§ 1, imm. 3

Siunnersuutigineqarpoq, inatsimmi oqartussanut taaguutit Namminersorlutik Oqartussat atuutsinneqalernerisa kingorna atorneqartunik nutarterneqassasut.

Tamatuma saniatigut oqaasertai iluarsineqarput, tassami paaqqinnittarfinni, eqqaavilerinermi pujoorfinnillu paaviaanermi akiligassiissutinut taaguutit allassimajunnaarmata. Akiligassiissutit taakkua inatsisit siunnersuummi nr. 2-miittut allattorsimaffiisa nutarterneqarneranni allassimammata. Siunnersuutigineqartoq, akileraaruseriffiup akiliisitsiniarnissamut, maannamut oqaasertaliinermi periarfissiissutigineqartutut, taamaaqataanik sulii piginnaatitaanerata, qulakkeersinnaanissaanut naammattumik ersarissutut isigineqarpoq. Taamaalilluni taamaallaat sunniutaasumik iluarsineq, suliaqarnermi pingaaruteqanngitsutut nalilerneqartoq, tassani pineqarpoq.

Nr. 3-mut

§ 2-mut inatsimmi § 1, imm. 2-mut innersuussissutip ilanngunnissaa siunnersuutigineqarpoq. Taamaalilluni innersuussinermi suleriaaseq atuuttoq aammalu akiligassiissutit ullumikkut akileraaruseriffimmit pinngitsaaliissummik akilersinniarneqarsinnaasut, ingerlateqqinneqarput. Akiligassiissutit Inatsisartut inatsisaannit aamma Inatsisartut peqqussutaannit allanit 27-neersut § 2-mi ilanngutsinneqarneranni, akileraaruseriffiup pinngitsaaliissummik akiliisitsiniarnissamut piginnaatitaanerisa annertusitinneqarnerinut peqatigitillugu tamanna pivoq.

Inatsisit akiligassiissutit siunnersuummi ilanngunneqanngiffii, Kalaallit Nunaanni eqqartuussisarnermik inatsimmi § 598, imm. 2-mi allassimapput. Tassani taamaalilluni allassimapput pigisami aalaakkaasumi qularnaveeqqusiilluni pisortat taarsigassarsiarititaasa utertillugit akilerneqarnissaannik piumasaaqatit, ineqarnermut akiliummik, kiassarnermut, innaallagissamut, imermut eqqaavilerinermullu akiliinissamik pisortat piumasaaqataat kiisalu akileraarutinut akitsuutinullu piumasaaqatit. Akiligassiissutit taakkua pillugit suleriaaseq taamaalilluni allannguuteqarani ingerlaannarpoq. Tassunga tunngatillugu maluginiarneqarsinnaavoq, taarsiivigineqarnissamik piumasaaqatit assigisaalluunniit Kalaallit Nunaanni eqqartuussisarnermik inatsimmi § 598, imm. 1-imeersut, assersuutigalugu attartortitsinermut atatillugu pissutsinut tunngassuteqartut, akileraaruseriffiup pinngitsaaliissummik akiliisitsiniarnissamut piginnaatitaanerata avataaniimmata.

Akiligassiissutaasartut, akileraaruseriffimmit akilersinniarneqarsinnaasut, annertusitinnissaat siunnersuutigineqartoq, akiligassiissutinik, akileraaruseriffimmi akilersinniarneqartussanngorlugit nassiunneqartunik, uppernarsaatinik qulakkeerinninnissaq pillugu isumaliutersuuteqarnissamut ammaavoq. Kisiannili piumasaaqatit akileraaruseriffimmi akilersinniarneqartussanngorlugit nassiunneqarsinnaanissaanut, akiligassiisumiit piumasaaqatip nassiunneqannginnerani isumaqatigiinngissinnaanerit paasinarsisinneqareersimanissaat, tunngavissaatinneqarpoq. Taamaalilluni pisortat akiligassiissutaannik eqqortumik sunniuteqarluartumillu akiliisitsiniaanissamut, tamatumunnga tunngavigineqartut nalornissutigineqannginnissaat, ersarilluinnartumik tunngavissaatinneqarpoq, tamatumalu akiligassiissutip nassiunneqannginnerani qulakkeernissaa akiligassiisup akisussaaffigaa. Taamaakkaluartoq akiitsoqartoq akileraaruseriffiup

akiliisitsiniarneranut atatillugu piumasaqaammi isumaqataasimangippat, akiitsoqartoq aamma tamatumunnga akileraaruseriffimmut akerliliissuteqarsinnaasussaavoq. Taamatut pisoqartillugu suliassaq Kalaallit Nunaanni eqqartuussisarnermik inatsimmi § 609, imm. 1-imi maleruagassat malillugit eqqartuussivimmut suliakkiissutigineqartussaassaaq.

Akiligassiissutaasartut siunnersuummi ilanngunneqartut amerlasoorujussuuneranni, sulisunik isumalluutininik aammalu eqqartuussivimmi suliassanut eqqartuussivimmullu akitsuutininik aningaasartuutininik atuisoqartariaqarani, akileraaruseriffiup akiliisitsiniarnissamut periarfissaannik sunniuteqarluarnerulersitsinissap pitsanngorsaannissallu kissaatigineqarnerani tassani pineqarpoq.

Naggataatigut siunnersuutigineqarpoq akiligassiissutaasartut allat pingasut nutaat § 2, imm. 1-imut ilanngunneqassasut. Piumasaqaat ataaseq tassaavoq aningaasarsianik annertunaarlugit tunniunneqarsimasunik utertillugit akiliinissamut piumasaqaat (nr. 3), aappaa tassaavoq qatserinermut atortunik tunisinermit akiliutinik pisortat piumasaqaataat (nr. 4) aammalu pingajuat tassaavoq ininik inuussutissarsiorfiusussanik attartornermit pisortat piumasaqaataat (nr. 5). Piumasaqaatit taakkua inatsimmi tunngavissaligaanngillat, taamaattumik piumasaqaatit inatsimmi § 1, imm. 2-mi ilanngunneqarsinnaanatik.

Akiligassiissutaasartut nr. 3-mi, 4-mi aamma 5-imi siunnersuutigineqartuni allassimasut, ullumikkut eqqartuussiviit aqutugalugit akilersinniarneqarnissaat pisariaqarpoq, tamannalu annertuunik aningaasartuuteqarfiusarpoq isumalluutinillu atuiffiusarluni. Siunnersuummi akiligassiissutaasartunut taakkununnga immikkut killiligaasunut toqqaannartumik akiliisitsiniarnissamut inatsimmi tunngavissaq ilanngunneqarpoq.

§ 2, nr. 3 pillugu erseqqinnerusumik – aningaasarsianik annertunaarlugit tunniussineq (condictio indebiti)

Oqaasertaliinissamut siunnersuutigineqartoq matumani ima paasineqassaaq, piumasaqaatit kukkunikkut pisortani sulisitsisup sulisumut aningaasarsianut annertunaarlugit tunniussinerani pilersimasut, tamatumalu kingorna akileraaruseriffik aqutugalugu piumasaqaatip akilersinniarneqarnissaa. § 2-mut ilanngussinermi, tamatuma kingorna eqqartuussiviit akuliutsinnagit piumasaqaatit akileraaruseriffimmi pinngitsaaliissummik akiliisitsiniarnissamut piareersimassapput.

Oqaatigineqassaaq, aningaasarsianik annertunaarlugit tunniunneqarsimasunik utertillugit akiliinissaq pillugu piumasaqaammut atatillugu akiligassiisup aamma akiitsoqartup akornanni isumaqatigiinngitsiqarsimasinnaasoq. Condictio indebitimut tunngatillugu periutsimik atuuttumik allangortitsiniarnermik siunnersuut anguniagaqanngitsoq tassunga tunngasutut oqaatigineqassaaq. Taamaalilluni aningaasarsiat amerlavallaartillugit akiliutinik pissarsisimanerminik aningaasarsiallip

ilisimasimassappagu, imaluunniit ilisimasariaqassagaluarpagu utertillugit akiliutigineqartarnissaat paatsuugassaangilluinnartumik sulii aallaavigineqassaaq.

Tamakku saniatigut akiligassiissutit akileraaruseriffimmi akilersinniarneqartussanngorlugit nassiuunneqartut uppersaataannik qulakkeerinnittarneq pillugu immikkoortoq matuma siulianiittoq kiisalu akiitsoqartup akileraaruseriffimmut akerriliissuteqarsinnaanera aammalu suliamik eqqartuussivimmut suliaakkiissuteqarsinnaanera, innersuussutigineqarput, takuuk Kalaallit Nunaannut eqqartuussisarnermut inatsimmi § 609, imm. 1.

§ 2, nr. 4 pillugu erseqqinnerusumik – qatserinermut atortut

Oqaasertaliinissamut siunnersuutigineqartoq matumani paasineqassaaq, piunasaqaatit kommunit imaluunniit Namminersorlutik Oqartussat qatserinermi atortunik tunisineranni pilersartut, ilanngullugit qapummik qatserutit, uliit qatserutit, slangenut ikkuffissat assigisaallu.

§ 2, nr. 5 pillugu erseqqinnerusumik – init illut initaannit allaanerusut (init inuussutissarsiornermut atorineqartut il.il.)

Tamatuma saniatigut Namminersorlutik Oqartussat imaluunniit kommunit ininik allanik, ataatsimiittarfinnik illuutinilluunniit inissianut siunertanit allaanerusumik attartornerannut akiliutinut piunasaqaataat pineqartunut ilanngutsinneqarput. Tamanna paasineqassaaq attartornermut tunngasuni attartornermut akiliummut piunasaqaat, pisortat illumi ininik attartornermut akiliummut piunasaqaataannik pinngitsaaliissummik akiliisitsiniartarneq pillugu Kalaallit Nunaanni eqqartuussisarnermik inatsimmi § 698, imm. 2, nr. 2-mi oqaasertaliinerup saniatigut inissisimasoq. Taamaaliornermi akileraaruseriffiup pinngitsaaliissummik akiliisitsiniarnissamut piginnaatitaaneri, inuussutissarsiornermut attartornerit assigiinngitsut pineqartunut ilaaterlugit, annertusitinneqarput, tassani taakkua taamaangippat oqaatsip ”illumi ini” avataaniilissammata, taanna inissianut siunertanut initut paasineqartarmat.

Nr. 4-mut

Siunnersuutigineqarpoq, § 3, imm. 6, atorunnaarsinneqassasoq, tassani inatsimmi § 3 a-mi aalajangersagaq taamaqataa nutaanerusorlu atuutereermat. Tassani teknikkikkut sunniutaasumik iluarsineq pineqarpoq.

Nr. 5-imut

Siunnersuutigineqarpoq, ilanngaatiginnissinnaatitaaneq annertusitinneqassasoq. Tamanna aamma tunniussinerit suut ilanngaatiginniffigineqarsinnaaneranngit aammalu akiligassiissutit suut ilanngaatiginninnermi matussuserneqarsinnaaneranngit tunngatillugu atuuppoq.

Akiligassiinernik tunniussinerni ilanngaatiginnissinnaalerneq

Siunnersuutigineqarpoq, ilanngaatiginnissinnaalerneq aammattaaq akiligassanik, assersuutigalugu akiligassiissutini assigisaannilu, akiliinissamut atatillugu pisortat tunniussineranni pisinnaassasoq.

Taamaaliormi paasineqassaaq pisortat akiligassamik, pilersuisumit nioqutissamik imaluunniit kiffartuussinermik pisinermi tigusaannik, akiliinerat. Nioqutissamik imaluunniit kiffartuussinermik pilersuineq isumaqatigiissut assigisaaluunniit naapertorlugu pisimasussaavoq.

Pisartut nalinginnaasuunerpaat tassaassapput, isumaqatigiissut nioqutissamik imaluunniit sullissinernik pilersuisumut, peqatigisaanik pisortanut akilinngitsuukkanik akiitsoqartumut, isumaqatigiissutigisimasat tunngavigalugu pisortat akiliinissaaq. Tamanna assersuutigalugu tassaasinnaassaaq sanasut suliffeqarfiat, suliaqarnerminut Namminersorlutik Oqartussat sullillugit suliarisimasaminnut akiligassiisummik nassiussisimasoq, aammalu suliffeqarfik peqatigisaanik kommunimut eqqaavilerinermut akiligassiisummumut akilinngitsuukkanik akiitsoqarluni. Pisumi taamaattumi siunnersuutigineqarpoq kommuni akiligassiisummumut tiguisussatut Namminersorlutik Oqartussat akiligassiisutip aningaasartaannik tunniussinissaaq ingerlattussanngorpassuk, ilanngaatiginnissinnaassasoq. Tunniussinermi taamaalilluni aningaasat sanasup suliffeqarfiata kommunimut akiitsuinut naapertuuttut ilanngaatigineqassapput. Taamaaliormi Namminersorlutik Oqartussat tunniussinerisa ilaat suliffeqarfiup kommunimut akiitsuinik akilinngitsuukkanik annikillisitsinissamut imaluunniit naligiissaanissamut atorneqassaaq. Tamatuma kingorna aningaasartai sinneqarpata, suliffeqarfimmumut taakkua tunniunneqassapput.

Aalajangersakkami siunnersuutigineqartumi, ullumikkut akiliisitsiniartartup ingerlatsinerani taarsiititsilluni akiliisitsisoqarluni pisartut ilai ilaaterlugit, ilanngaatiginnissinnaatitaaneq annertusitinneqarpoq. Kisiannili akiliisitsiniartartup ingerlatsinerani taakkua, taagorneqartut taarsiititsilluni akiliisitsinernik ingerlatsinerit, akileraaruseriffimmi annertuunik isumalluutininik atuiffiusariaqartarput. Taamaalilluni tamatumunnga inatsisit malillugit pisussat amerlasuujusarput. Taarsiititsilluni akiliisitsinernik ingerlatsinerit kingunerisarpaat, akileraaruseriffiup pisortat akiligassiinernik tunniussinissaanni taarsiititsilluni akiliisitsinnaalernerani, tassami tamatumunnga piomasaaqatit naammassineqarsimalissammata. Ilangaatiginnissinnaatitaanerup annertusitinnissaanni siunnersuutigineqartumi taamaalilluni akiitsoqartup inatsisitigut isumannaatsuunissaa piliutigineqassanngilaq. Kisiannili akileraaruseriffiup akiliisitsiniarnermik suliaqarnera sunniuteqarluarnerulersinneqassaaq, tassami taarsiititsilluni akiliisitsinernik ingerlatsinerimut atasumik suliat ingerlasarneri isumalluutininik atuiffiusartut, suliat ingerlanerinit ingerlaannartunngortinneqartunit taarserneqarsinnaalissammata.

Akiligassiisutaasartunik, ilanngaatiginnissinnaalernermi matussuserneqarsinnaasunik, annertusititsineq

Siunnersuutigineqarpoq, akiligassiisutit ilanngaatiginnissinnaalernermi matussuserneqarsinnaasut allattorsimaffiannut atuuttumut akiligassiisutaasartut arlallit ilanngunneqassasut, taamaalilluni akiligassiisarnermi ilanngaatiginnissinnaatitaaneq § 2-mi siunnersuutigineqartumi allasimasut annertoqqatingajaanik annertussuseqalissalluni. Taamaalilluni siunnersuutigineqarpoq, inatsimmi § 1, imm. 2-mut innersuussineq ilanngunneqassasoq. Allattuiffiup tamakkerlugu ilanngunissaa naleqquttoq naliliisoqarpoq, tassami tamanna akileraaruseriffiup akiliisitsiniarnermik

suliaqarneranut pitsaanerpaanik sinaakkusiisussaammat, taamatullu innuttaasut inatsisitigut isumannaatsuunerat pilliutigineqartussaananani.

Akiligassiissutaasartut, akileraaruseriffiup ilanngaatiginnissinnaalernerani matussuserneqarsinnaasut annertusitinnissaanni siunnersuutigineqartumi, akiligassiissutip suminngaaneerpera eqqarsaatiginagu sakkussatut annertunerusumik atorneqarsinnaalissaaq. Taamaaliornermi suliap ingerlasarnera ingerlaavartunngortinneqarsinnaanerulertussaalluni, tassami isumalluutunik atuiffiusumik atortoqarani toqqartuisoqartarunnaassammat.

Tamatuma saniatigut naliliisoqarpoq siunnersuut innuttaasut inatsisitigut isumannaatsuunissaannut atatillugu ajornartorsiutitaqassanngitsoq, tassami siunnersuutigineqartumi, akiligassiissutunik tunniussinermi ilanngaatiginnissinnaanermut atatillugu matuma siuliani taaneqartutut, taamaaqataanik nalilersuinissaaq pisussaammat. Maannakkut isumalluutunik atuiffiusumik taarsiititsilluni akiliisitsinermut suleriaaseqarneq, annertunerpaatigut ilanngaatiginnissinnaalernermik taarserneqartussaassaaq.

Akiligassiissutitut tunngatillugu aammattaaq siunnersuutigineqarpoq, aningaasarsianik annertunaarlugit tunniunneqarsimasunik utertillugit akiliinissamut pisortat piumasaqaataannut matussutissatut ilanngaatiginnittoqarsinnaassasoq. Tamatuma saniatigut siunnersuutigineqarpoq, ininik inuussutissarsiorfiusussanik attartornermut aamma qatserinermut atortunik tunisinermut akiliutissanut piumasaqaatinik matussusiinissamut ilanngaatiginnittoqarsinnaassasoq. Siunnersuummut nr. 2-mut nassuiaatit innersuussutigineqarput, tassani tamanna erseqqinnerusumik nassuiarneqarmat.

Nr. 6-imut

Siunnersuutigineqarpoq § 6 atorunnaarsinneqassasoq, tassami akiligassiissutitut taaneqartunut akiliisussaaneq, tamatumunnga inatsimmi ataaniittumi atuutereermat.

Nr. 7-imut

Siunnersuutigineqarpoq, neqeroortitsinermut innersuussut peerneqassasoq, tassami neqeroortitsisarnermut inatsimmi tamanna pillugu immikkut maleruagassaaq assingusoq (tamakkiisumiunngitsorli) atuummat. Taamaalilluni pisortat neqeroortitsisarnerini pissutsit aalajangersimasut erseqqinnerusut arlallit atuupput. Taamaalilluni pissutsit taakku tamatigoortumut ilaatinnagit tamakku pillugit inatsisini aalajangersimasuni inatsisilersugaanissaasa tulluarnepaanissaa nalilersuutaavoq.

Tamatuma saniatigut siunnersuutigineqarpoq inatsimmi oqartussanut taaguutit, Namminersorlutik Oqartussat atuutilernerisa kingorna atorneqartunik, nutarterneqassasut.

Nr. 8-mut, 9-mut, kiisalu 11-mit 14-imut, aamma 16-imut

Siunnersuutaavoq, inatsimmi oqartussanut taaguutit, Namminersorlutik Oqartussat atuutilernerisa kingorna atorpeqartunik, nutarterneqassasut, soorlulusooq siunnersuummi § 1, nr. 1-imi inatsimmik taaguutip allangortinnerata kingornatigut aalajangersakkamik tamatuma kingunerisaatut assigiissitsilerluni naqqiissuteqarnissaq siunnersuutigineqarluni.

Nr. 10-mut

Siunnersuutigineqarpoq, akiligassiissutinut akiliisitsiniarnissamut tunniunneqartunut piumasaqaatit pillugit aalajangersakkamut atuuttumut annikinnerpaaffissanut killissaq ilanngunneqassasoq, taamaalillutik akileraartitsisarfirmi akiligassanngortillugit nassiunneqartutut akileeqqusissutit 100 koruunit sinnersimalissallugit.

Annikinnerpaaffissanut killissaq 2021-mut Aningaasanut inatsimmiilli, aningaasanut inatsimmi ”Suliassa qarfirmut 20-24-mut Aningaasaqarnermut Naligiissitaanermullu” oqaasertaliussaq nr. 3 atuussimavoq. Taamaalilluni maleruagassaq atuuttoq, ullumikkut ukiumoortumik aningaasanut inatsimmi allassimasoq, inatsimmut aalajangersimasumut nuutinneqartoq tassani pineqarpoq.

Tamatuma saniatigut siunnersuutigineqarpoq, kommunit akiligassiissutaannut ulluni 14-ini piffissaliinissaq ilanngunneqassasoq. Tamatumani siunertaavoq, kinguaattoorluni akiliutit, kommunimiit akileraaruseriffimmut akiligassiissummik nassiussinerit paarlallugit, pisoqartarnerinik killilersimaarinninnissaq. Taamaaliornermi akileraaruseriffiup akiligassiissutinik akilerneqareersunik akiliisitsiniarnermik iliuuseqarsinnaanera killilersimaarneqassaaq.

Tamatuma saniatigut kommuninit akiligassiissutaasunut qaammatsiutini ulluni 14-ini piffissaq akiliinngiffiusussap ilanngunnissaa siunnersuutigineqarpoq. Oqaasertaliussatut akileeqqusissummut piffissaliussamit ingerlasutut qaammatsiutini ullut ilivitsut 14-iuneri paasineqassapput, tassalu kommunimit akileeqqusisumit akileraaruseriffimmut nassiunneqarsinnaanissaata tungaanut.

Nr. 15-imut

Ataani normuni allannguutit kingunerisaaatut assigiissitsilerluni naqqiissuteqarnikkut qulequttap “Agguaanermut aalajangersakkat” atorunnaarsinnissaa siunnersuutigineqarpoq.

Nr. 17-imut

§ 11 e-p atuutereertup atorunnaarsinnissaa, aammalu aalajangersakkamik nutaamik tassanga taarsiisoqarnissaa siunnersuutigineqarpoq.

Aalajangersakkami nutaami siunnersuutigineqarpoq, allakkianik atsiorneqanngitsunik imaluunniit atsiornermik maskiinamik issuarneqartumik atsiorneqartumik akiliisitsiniartartut atuutsitsilernissaat pillugu maleruagassanik aalajangersaanissamik Naalakkersuisut periarfissinneqassasut. Pisortanut akiitsunik akilinngitsuukkanik akiliisitsiniartarneq pillugu Namminersorlutik Oqartussat

nalunaarutaata iluarsaanneqarnerani pisussami aalajangersakkap atorneqarnissaa eqqarsaatigineqarpoq.

Aalajangersakkap oqaasertalerneqarnerani siunertaavoq, pisortat ingerlatsivianni oqartussamit allakkiat atsiorneqarsimanissaat pillugu pisortat ingerlatsinerannut inatsisini piumasaqaatini ilaatitsinnginnissaq, nalunaarutikkut pisinnaassasoq. Aalajangersakkamut ilaatigut tunngavigineqarpoq, akileraaruseriffiup allakkianik ingerlaannartumik allakkianngortinneqartunik amerlasuunik nassiussuisarnera. Allakkiat taakkua tamarmik immikkut atsiorneqarsimanissaat sulisullu atiata allassimanissaa, tulluanngissinnaavoq.

Eqqarsaataavoq allakkiat pineqartut taakkua nalunaarutitut ilusilimmi allassimassasut, taamaalilluni allakkiat aalajangersarneqartut tassani pineqarnerat qulakkeerneqassalluni.

Nr. 18-imut

§ 11 f-ip atuutereertup atorunnaarsinnissaa, aammalu aalajangersakkamik nutaamik tassannga taarsiisoqarnissaa siunnersuutigineqarpoq.

Siunnersuutigineqarpoq, akiligassiissutit ataasiakkaat 100 koruuninik annikinnerusumilluunniit aningasartai sinneqalerpata, akileraaruseriffiup akiligassiissutit pisassalinnut utertissinnaassagai pillugit aalajangersagaq nutaaq atuutsinneqalissasoq. Inatsisip oqaasertaanni akiligassiisumut utertitsineq atorneqarpoq, tassami akileraaruseriffik isumakkeerinissamut imaluunniit allatut aningaasat kommuninut allanullu utertinneqartut qanoq pineqassanersut isummerfiginissaanut piginnaatitaanngimmat.

100 koruuninut killiliineq, akiligassiissutinik 100 koruunit sinnerlugit akiliisitsiniarnissamut nuussisarnermut annikinnerpaaffissatut killiliussaq pillugu siunnersuummi nr. 11-mut ataqatigiissillugu isigineqassaaq. Siunnersuut pingaarnertigut 2021-mut Aningaasanut inatsimmili, aningaasanut inatsimmi ”Suliassaqarfimmut 20-24-mut Aningaasaqarnermut Naligiissitaanermullu” oqaasertaliussami nr. 2-mi inatsimmi aalajangersaaneruvoq. Taamaalilluni ukiumoortumik aningaasanut inatsisaasuni takuneqarsinnaasutut malittarisassiap atuutereertup inatsisini aalajangersimasuni ilanngunneqarnissaa taamaallaat pineqarpoq, taamaattorli siunnersuutip 100 kr.-nik killeqarfimmik imaqaarnerani oqaasertaliussani aningaasat 300 kr.-uneranik annikinnermik iluarsinertaqartillugu.

Tamatuma saniatigut siunnersuutigineqarpoq, akiligassiissutit ataasiakkaat aningaasartai pingaarnertit imaluunniit aningaasartai sinneruttut 100 koruuninik annikinnerusumilluunniit annertussuseqarpata, kommunit aamma Naalackersuisut nammineerlutik akiligassiissutiminnik isumakkeerinissamut piginnaatinneqassasut. Aalajangersagaq aqutsisoqarfimmi malittarisassiatut isigineqassaaq, taanna akileeqqusissutit annikitsut missiliuiffigeqqaarnagit isumakkeerfiginissaannut kommuninut aamma Namminersorlutik Oqartussanut aqqutissamik tunisisuulluni. Tunngavissaq inatsisini ingerlatsineranut tunngasuni taarsigassanik

isumakkeerisarnerit pillugit, kiisalu tamakku pillugit allaqqassasut malittarisassat pillugit najoqqutarisat sinnerinut ilassutissatut isumaliutigineqarpoq, ilanngullugit assersuutigalugit Akileraaruserinermik ingerlatsineq pillugu Inatsisartut inatsisaanni §§ 53-57-iniittut.

Nr. 19-imut

Ataani normuni allannguutinik kingunerisaatut assigiissitsilerluni naqqiissuteqarnikkut qulequttap “Akiliisarnerit” atorunnaarsinnissaa siunnersuutigineqarpoq.

Nr. 20-mut

§ 11 g-p atorunnaarsinnissaa siunnersuutigineqarpoq, taanna atugaasutut isigineqanngimmat, taamaattumillu pisariaqanngitsutut isigineqarluni.

Nr. 21, 22 aamma 24-mut

§ 12-imi aalajangersakkap § 12, imm. 3-tut nutaannortillugu nuunneqassasoq, aammalu oqaasertamigut nutarsarneqassasoq siunnersuutigineqarpoq, taamaalilluni inatsisilioriaatsimi malittarisassanut atuuttunut pineqaatissiinermut inunnut inatsisitigut pisinnaatitaasunut aalajangersagaq naapertuutilissamat. Taamaalilluni teknikkikkut allannortitsineq taamaallaat tassani pineqarpoq, tassami suleriaaseq allannortinnagu ingerlatiinnarneqarmat.

Tamatuma kingunerisaatut § 12, imm. 3 imm. 4-tut nutaatut nuunneqarpoq, soorlulusooq taanna oqaasertalersugaanermigut taamatuttaaq nutarsarneqarluni.

Tamatuma sanatiqut § 12 c-p § 12-imut imm. 5-itut nutaatut nuunneqarnissaa siunnersuutigineqarpoq.

Tamatuma kingunerisaatut § 12 b aamma § 12 c paragraffitut immikkoortutut atorunnaarsitaapput.

Nr. 23-mut

Namminersorlutik Oqartussat eqqunneqarnerisa kingornatigut taakkununnga atorneqartunut inatsimmi pisortanik taaguutaasut nutarsarneqarnissaat siunnersuutigineqarpoq. Tamatuma saniatigut aalajangersakkami imm. 2 imatut nutarsarneqassasoq, taamaalilluni inatsimmi innersuussissutaasoq atuuttumut allannortillugu siunnersuutigineqarpoq.

Nr. 25-mut

§ 13-ip oqaasertalersugaaqqinnissaa siunnersuutigineqarpoq. Ilaatigut pisortat taaguutaannik aamma inatsisip taaguutaanik allannortitamik nutarsaaniarluni, ilaatigullu imm. 2-mik aamma imm. 3-mik atorunnaarsitsiniarluni. Imm. 2 attuumassutilittut isigineqarunnaarmat atorunnaarsinneqarpoq, aammalu imm. 3 siunnersuummi § 1, nr. 6-ip, § 6-imik, § 13, imm. 3-imi innersuussutigineqartumik kingunerisaatut assigiissitsilerluni naqqiissuteqarnertut atorunnaarsinneqarluni.

§ 2-mut

Siunnersuutigineqarpoq inatsit ulloq 1. januar 2025 atuutilissasoq.

Inatsisartut inatsisaat inatsimmi ilaasutut akileeqqusissutinut tamanut atuuppoq, apeqqutaanatik qaqugukkut akileeqqusinerit pinngorsimaneri, imaluunniit pinngortuuneri.

Ilanngussaq 1

Siunnersuut inatsimmut atuuttumut sanilliullugu	
<i>Oqaasertalerneqarnera atuuttoq</i>	<i>Siunnersuut</i>
	§ 1 Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni nr. 3, 2. maj 1996-imeersumi, kingusinnerusukkut Inatsisartut inatsisaanni nr. 13, 3. juni 2015-imeersumi allanngortinneqartumi, makkua allanngortinneqarput:
Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaa	1. Inatsisip qulequtaa imatut oqaasertalerneqarpoq: Pisortanut akiitsunik akilinngitsuukkanik akiliisitsiniartarneq pillugu Inatsisartut inatsisaat.
<p>§ 1. Inatsisartut inatsisaanni matumani Kalaallit Nunaanni Namminersornerullutik Oqartussat Kalaallillu Nunaanni kommunit akiligassiissutaannik akiliisitsiniartarneq pineqarpoq.</p> <p><i>Imm.</i> 2. Inatsisartut inatsisaat pisassarisanut Inatsisartut inatsisaat peqqussutaallu makkua tunngavigalugit pilersimasunut atuuppoq:</p> <ol style="list-style-type: none"> 1) Aningaasarsianit akileraarutit pillugit Inatsisartut inatsisaat, 2) Akileraaruserinermik ingerlatsineq pillugu Inatsisartut inatsisaat, 3) Pappiaqqanik nalilinnik naqissusiinermi akitsuut pillugu Inatsisartut inatsisaat, 4) Eqquiniaasitsinermi akileraarutit pillugit Inatsisartut inatsisaat, 5) Aningaasanik ikisilluni pinnguaatinut akileraarut pillugu Inatsisartut inatsisaat, 6) Umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarutit pillugit Inatsisartut inatsisaat, 	<p>2. § 1 imatut oqaasertalerneqarpoq:</p> <p>§ 1. Matumani Inatsisartut inatsisaat kommunit aamma Namminersorlutik Oqartussat akiligassiissutaannik akiliisitsiniartarnermut tunngassuteqarpoq.</p> <p><i>Imm.</i> 2. Inatsisartut inatsisaat Inatsisartut inatsisai Inatsisartullu peqqussutai makkua naapertorlugit akiligassiissutaalersimasunut atuuppoq:</p> <ol style="list-style-type: none"> 1) Aningaasarsianit akileraarutit pillugit Inatsisartut inatsisaat. 2) Akileraaruserinermik ingerlatsineq pillugu Inatsisartut inatsisaat. 3) Pappiaqqanik nalilinnik naqissusiinermi akitsuut pillugu Inatsisartut inatsisaat. 4) Eqquiniaasitsinermi akileraarutit pillugit Inatsisartut inatsisaat. 5) Aningaasanik ikisilluni pinnguaatinut akileraarut pillugu Inatsisartut inatsisaat. 6) Umiarsualivimmiinnermut aamma umiarsuarni takornariartaatini ilaasunut akileraarutit pillugit Inatsisartut inatsisaat. 7) Qamutit motorillit akileraarutaat pillugit Inatsisartut inatsisaat.

<p>7) Qamutit motorillit akileraarutaat pillugit Inatsisartut inatsisaat,</p> <p>8) Raajanut akitsuutit pillugit Inatsisartut inatsisaat,</p> <p>9) Inuussutissarsiutitigut ilinniagaqarnermut sulisitsisut akiliutaat pillugit Inatsisartut inatsisaat,</p> <p>10) Sulisoqarnermut akitsuut pillugu Inatsisartut inatsisaat,</p> <p>11) Imigassat ethanolimik akullit Kalaallit Nunaanni sananeqarsimasut akitsuutaat pillugit Inatsisartut inatsisaat,</p> <p>12) Meeqqanut ileqqaakkat pillugit Inatsisartut inatsisaat,</p> <p>13) Ilinniagaqarnermut pillugit Inatsisartut peqqussutaat,</p> <p>14) Inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaat,</p> <p>15) Meeqqanut akilersuutit il.il kiisalu meeravissartaarnermi tapiissutit tunniunneqartarneri pillugit Inatsisartut peqqussutaat,</p> <p>16) Pisortanit ikiorsiissutit pillugit Inatsisartut peqqussutaat,</p> <p>17) Inissianik attartortitsisarneq pillugu Inatsisartut peqqussutaat,</p> <p>18) Inissialiornermut tapersiissuteqartarneq pillugu Inatsisartut peqqussutaat,</p> <p>19) Aalisarnermut, piniarnermut nunalerinermullu tapersiisarneq pillugu Inatsisartut peqqussutaat</p> <p>20) Aalisarnermik, piniarnermillu inuussutissarsiutillit inuussutissarsiornernannik siuarsaaneq pillugu Inatsisartut peqqussutaat,</p> <p>21) Nunalerinermut tapersiisarneq pillugu Inatsisartut peqqussutaat,</p> <p>21) Aalisarnermut aningaasaliissutinut immikkoortitat pillugit Inatsisartut inatsisaat,</p>	<p>8) Aalisarnermi pisarineqartut isumalluutinik atuinnermut akitsuutaat pillugit Inatsisartut inatsisaat.</p> <p>9) Pigisanit pissarsiat ilaasa akileraaruserneqartarnerat pillugu Inatsisartut Inatsisaat.</p> <p>10) Sulisoqarnermut akitsuut pillugu Inatsisartut inatsisaat.</p> <p>11) Imigassat aalajangersimasut Kalaallit Nunaanni sananeqarsimasut akitsuutaat pillugit Inatsisartut inatsisaat.</p> <p>12) Kulturikkut ingerlatsineq sunngiffimmilu sammisassaqaartitsineq pillugit Inatsisartut inatsisaat.</p> <p>13) Ilinniagaqarnermut pillugit Inatsisartut inatsisaat.</p> <p>14) Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat.</p> <p>15) Meeqqanut akilersuutit il.il. kiisalu meeravissartaarnermi tapiissutit tunniunneqartarneri pillugit Inatsisartut peqqussutaat.</p> <p>16) Pisortanit ikiorsiissutit pillugit Inatsisartut Inatsisaat.</p> <p>17) Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat.</p> <p>18) Inissianik attartortitsisarneq pillugu Inatsisartut peqqussutaat.</p> <p>19) Nukissiornermi ikummatissat avatangiisinut akitsuutaat pillugu Inatsisartut inatsisaat.</p> <p>20) Aalisarnermik piniarnermillu inuussutissarsiutillit inuussutissarsiornernannik siuarsaaneq pillugu Inatsisartut inatsisissaattut.</p> <p>21) Nunalerinermik inuussutissarsiornernannik siuarsarneqarnissaa pillugu Inatsisartut inatsisaat.</p> <p>22) Kommunit inuussutissarsiutini il.il. aningaasaliinermikkut inuussutissarsiutinik ineriartortitseqataanissaminut periarfissaat pillugit Inatsisartut inatsisissaat.</p> <p>23) Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaat.</p>
--	--

<p>22) Kommunit inuussutissarsiutini il.il. aningaasaliinermikkut inuussutissarsiutinik ineriartortitseqataanissaminnut periarfissaat pillugit Inatsisartut inatsisissaa,</p> <p>23) Takornarianut, Nunamilu suliffeqarfiit siuarsarneqarnissaannut Inatsisartut inatsisaat,</p> <p>24) Biblioteqarnermi Inatsisartut peqqussutaat aamma</p> <p>25) Unammillernermi Inatsisartut inatsisaa.</p> <p><i>Imm. 3. Aammattaq Kalaallit Nunaanni Namminersornerullutik Oqartussat kommunillu akiligassiissutaat, paaqqinnittarfinni angerlarsimaffimmilu ulluunerani meeqqanik paaqqinnittarnernut, kiassarnermut, innaallagissamut, imermut, eqqaanermut, pujoorfinnik paaviaanermullu innuttaasut suliffeqarfiillu akiligassaasa akilersinniarneqartarnerini Inatsisartut inatsisaat manna atuuppoq.</i></p>	<p>24) Atuagaateqarfiit pillugit Inatsisartut inatsisaat.</p> <p>25) Unammilleqatigiinneq pillugu Inatsisartut inatsisaat.</p> <p>26) Peqqinnissaqarfiup sullissineri il.il. pillugit Inatsisartut peqqussutaat.</p> <p>27) Sermip erngullu niuernikkut iluaqutigineqarnissaat pillugu Inatsisartut inatsisaat.</p> <p>28) Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaat.</p> <p>29) Aatsitassat pillugit ingerlatallu tamatumunnga pingaarutillit pillugit inatsisartut inatsisaat.</p> <p>30) Aatsitassanut tunngasunik suliaqarneq pillugu Inatsisartut inatsisaat.</p> <p>31) Naartunermi, erninermi meeravissartaarnermilu sulinngiffeqartarneq pillugu Inatsisartut inatsisaat.</p> <p>32) Utoqqalinersiaqarneq pillugu Inatsisartut inatsisaat.</p> <p>33) Siusinaartumik pensionisiat pillugit Inatsisartut inatsisaat.</p> <p>34) Meeqqanut tapiissutit pillugit Inatsisartut inatsisaat.</p> <p>35) Suliffissarsiortunut ikiorsiissutit pillugit Inatsisartut Inatsisaat.</p> <p>36) Pilersaaruseriorneq aamma nunaminertat atorneqartarnerat pillugit Inatsisartut inatsisissaat.</p> <p>37) Avatangiisit innarlitsaaliorneqarnissaanik Inatsisartut inatsisaat.</p> <p>38) Imaani avatangiisit illersorneqarnissaat pillugu Inatsisartut inatsisaat.</p> <p>39) Inuit innarluutillit tapersorneqarnissaannut Inatsisartut inatsisaat.</p>
--	--

	<p>40) Kalaallit Nunaanni annaassiniarnissamut upalungaarsimaneq aamma ikuallattoornissamik qaartoonissamillu pitsaaliuinermi iliuusissat pillugit Inatsisartut inatsisaat.</p> <p>41) Sanaartorfissagissaaneq, pisortat kuuffeqarfinnut aqqusersuutaat aamma pisortat aqqusiniutaat pillugit Inatsisartut inatsisaat.</p> <p>42) Meeqqanut sulii atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaattut siunnersuut.</p> <p>43) Aalisarnermut aningaasaliissutinut immikkoortitat pillugit Inatsisartut inatsisaat.</p> <p>44) Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat.</p> <p>45) Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaat.</p> <p>46) Najukkani aatsitassanut tunngasunik suliaqarneq pillugu Inatsisartut inatsisaat.</p> <p>47) Illut piginneqatigiit pigisaat pillugit Inatsisartut inatsisaat.</p> <p>48) Illunut aningaasaliisarnerit pillugit Inatsisartut inatsisaat.</p> <p>49) Naqitsinermut akitsuut pillugu Inatsisartut inatsisaat.”</p> <p>” <i>Imm. 3.</i> Inatsisartut inatsisaat aamma kommunit aamma Namminersorlutik Oqartussat innuttaasut suliffeqarfiillu kiassarnermut, innaallagissamut imermullu akiliinissamut pisussaaffinni akiligassiissutaannik akiliisitsiniarnermi atuuppoq.</p>
<p>§ 2. Pisassarisat § 3, imm. 4 aamma 5-imi taaneqartut pisassarisallu meeqqanut</p>	<p>3. § 2 imatut oqaasertalerneqarpoq: § 2. Akiligassiissutit makkua Kalaallit Nunaanni eqqartuussisarnermik inatsimmi</p>

<p>ileqqaakkat pillugit inatsit naapertorlugu, ilinniagaqarnersiutit pillugit Inatsisartut peqqussutaat, inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaat, pisortanit ikiorsiissutit pillugit Inatsisartut peqqussutaat, bibliotekeqarneq pillugu Inatsisartut peqqussutaat naapertorlugit kiisalu Namminersornerullutik Oqartussat kommunillu ulluunerani meeqqerivinnut pujoorfinnillu paaviaanernut akiliutinik pisassarisaat, Kalaallit Nunaanni eqqartuussisarnermik inatsimmi eqqartuussutinik il.il. naammassiniartarnermut malittarisassat malillugit pinngitsaaliinikkut akilersinneqarsinnaapput.</p>	<p>akiligassiissutinik pinngitsaaliissummik naammassinnitsitsisarneq pillugu kapitali 46-mi aamma 47-mi maleruagassat malillugit pinngitsaaliissummik naammassitinneqarsinnaapput:</p> <ol style="list-style-type: none"> 1) Akiligassiissutit § 3, imm. 4-mi aamma 5-imi taaneqartut. 2) § 1, imm. 2, nr. 12-17-imi, aamma nr. 20-48-mi ilaasutut akiligassiissutit. 3) Kommunit aamma Namminersorlutik Oqartussat aningaasarsianik annertunaarlugit tunniunneqarsimasunik utertillugit akilerneqarnissaannik piunasaqaataat. 4) Kommunit aamma Namminersorlutik Oqartussat qatserinermut atortussanik tunisinermut akiliinissamut piunasaqaataat. Kommunit aamma Namminersorlutik Oqartussat ininik, ataatsimiittarfinnik imaluunniit illuutinik, illup initarinngisaannik, attartornermut akiliinissamut piunasaqaataat.
<p>§ 3, imm. 6: Imm. 6. Aningaasat imm. 1 naapertorlugu ilanngartuutaasimasut qaammatip ilanngaassuiffigineqarsimasup ulluisa kingullianni akiligassanngussapput, kingusinnerpaamillu akilerneqartussaallutik qaammatip tulliani ulluinnarmi kingullermi.</p>	<p>4. § 3, imm. 6, atorunnaarsinneqarpoq.</p>
<p>§ 5, imm. 1: § 5. Akileraarutinut akiliutaavallaarsimasut utertinneqalerneranni kommunit, pissarsisussap utertitassanngorlugit ikiorsiissutinut, pilersuisussaataitanermit akilersuutinut siumoortumik tunniunneqartartunut, inuussutissarsiutitigut suliffeqarfinnut aningaasatigut attartortissimasanut, kommunit inuussutissarsiutitigut suliffeqarfinnut il.il. aningaasaliinermikkut inuussutis-sarsiutinik</p>	<p>5. § 5, imm. 1, imatut oqaasertalerneqarpoq: “ Akileraarutinik annertunaarlugit akilerneqarsimasunik utertillugit akiliinermi aammalu kommunip imaluunniit Namminersorlutik Oqartussat inunnut imaluunniit inatsisitigut pisinnaatitaasunut nioqqtissanut sullissinernullu akiliuteqarneranni, kommunit aamma Namminersorlutik Oqartussat pisinnaatitaasup akiligassiissutit makkua pillugit akiitsuisa</p>

<p>ineriartortitseqataasinnaanerannut atatillugu pisassarisanut, kiisalu paaqqinnittar-finni angerlarsimaffinnilu ulluunerani paaqqinnittarnermut, eqqaanermut pujoorfinnillu paavi-aanermut pisassarisanut akilerneqartussanngoreersimagaluartunut akiligassarisaanut naaper-tuuttunik ilanngartuisinnaatitaapput.</p>	<p>akiligassanngoreersut akilerneqanngitsut aningaasartaattut annertussusilinnik ilanngaassisinnaapput:</p> <ol style="list-style-type: none"> 1) Akiligassiissutit § 1, imm. 2-mi aamma imm. 3-mi ilaasut. 2) Aningaasarsiat annertunaarlugit tunniunneqartut utertillugit akilerneqarnissaannut akiligassiissutit. 3) Qatserinermut atortussanik tunisinermut akiliutissanut akiligassiissutit. Ininik illup initaannit allaanerusunik attartornermut akiliutissanut akiligassiissutit.
<p style="text-align: center;"><i>Akisussaaqatigiinneq</i></p> <p>§ 6. Aappariit inuillu nalunaarsorneqarsimasumik aappariittut inooqatigiit, inissianik attartorneq pillugu Inatsisartut peqqussutaat tunngavigalugu akiligassanut kiisalu eqqaanermut pujoorfinnillu paaviaanermut atatillugu Namminersornerullutik Oqartussat kommunillu akiligassiissutaannut assigiimmik akisussaaqatigiipput.</p> <p><i>Imm. 2.</i> Imm. 1 naapertorlugu assigiimmik akisussaaqatigiinneq, aappariinnerup imaluunniit aappariittut nalunaarsorneqarsimasutut inooqatigiinnerup nalaani akiligassiissutaasimasunut taamaallaat atuuppoq.</p> <p><i>Imm. 3.</i> Aappariit meeqqamut meeqqanulluunniit pilersuisussaataitanermik aalajangersaavigineqarsimanngippata imm. 1-mi aalajangersagaq aammattaaq Namminersornerullutik Oqartussat kommunilu paaqqinnittarfiini, angerlarsimaffinnilu ulluunerani paaqqinnittarnermut akiligassiissutaannut atuutsinneqarpoq.</p>	<p>6. § 5-ip kingorna immikkoortup qulequtaa “Akisussaaneq”, aamma § 6 atorunnaarsinneqarput.</p>
<p>§ 7: § 7. Sanaartugassanut suliassanullu allanut suliffeqarfiit sulisussarsiarineqarnerini</p>	<p>7. § 7 imatut oqaasertalerneqarpoq: § 7. Suliffeqarfiit illuliornernik sanaartornernillu suliassanik</p>

<p>imaluunnit nioqputissanik kiffartuussissutissanilluunniit inniminniisoqartillugu Naalakkersuisut kommunalbestyrelsilluunniit aalajangersinnaavaat aalajangiinermi suliffeqarfiit akilerneqanngitsunik akileraarutitut akitsuutinullu akiligassaartoqarnera isigineqassasoq. <i>Imm. 2.</i> Imm. 1-imi aalajangersakkat pillugit Naalakkersuisut malittarisassanik erseqqinnerusunik aalajangersaasinnaapput.</p>	<p>suliarinninnissamut sulissussarsiarineqarneranni, suliffeqarfiit akileraarutit akitsuutillu pillugit akilerneqanngitsunik, akiligassanngoreersunik akiitsoqarnerisut eqqarsaatigineqassanersoq, kommunalbestyrelsi aamma Naalakkersuisut aalajangiisinnaapput. <i>Imm. 2.</i> Aalajangiinerit imm. 1-imi taaneqartut pillugit maleruagassanik Naalakkersuisut aalajangersaasinnaapput.</p>
<p>§ 10: § 10. § 1, imm. 2-mi aamma 3-mi Inatsisartut inatsisaat peqqussutaallu taaneqartut tunngavigalugit akiligassiissutitik akiliisitsiniartartut akiliisitsiniarneritut atatillugu akiliuteqartitsisarneq pillugu malittarisassanik Naalakkersuisut aalajangersaasinnaapput.</p>	<p>8. § 10 imatut oqaasertalerneqarpoq: § 10. § 1, imm. 2-mi aamma 3-mi ilaasuni akiligassiissutitik akiliisitsiniartartut akiliisitsiniarnerannut atatillugu akiligassiisarneq aamma akiliisarneq pillugit maleruagassanik Naalakkersuisut aalajangersaasinnaapput.</p>
<p>§ 11: § 11. § 1-mi Inatsisartut inatsisaat peqqussutaallu taaneqartut tunngavigalugit akiligassiissutitik akiliisitsiniartarnermi periusaasut pillugit malittarisassanik Naalakkersuisut aalajangersaasinnaapput.</p>	<p>9. § 11 imatut oqaasertalerneqarpoq: § 11. § 1, imm. 2-mi aamma 3-mi ilaasuni akiliisitsiniarnermi periaasissaq pillugu maleruagassanik Naalakkersuisut aalajangersaasinnaapput.”</p>
<p>§ 11 a, imm. 3: <i>Imm. 3.</i> Akiligassiissutit akileraaruserivimmut tunniunneqassapput akiliisitsiniarnissaq anguniarlugu, tassani akiliinissamut piffissaliussaq qaangerneqareersimappat, aammalu akiliisitsiniarnerit kinguneqarsimanngippata. Kommuninili pisassarisat akileraaruserivimmut akilersinniagassanngorlugit tunniunneqassapput akiliinissamut piffissaliussap qaangiunnerani.</p>	<p>10. § 11 a, imm. 3, imatut oqaasertalerneqarpoq: <i>Imm. 3.</i> Akiligassiissutit 100 koruuninik sinnerlugit annertussusillit, akiliinissamut piffissamut killigititap qaangiutereernerani, aammalu nalinginnaasumik nukingisaarutitut suleraatsit iluaqutaanngitsumik ingerlanneqareersimalerneranni, akileraaruseriffimmut akilersinniarneqartussanngorlugit tunniunneqassapput. Kommunini akiligassiissuteqartut, akiliinissamut piffissamut killigititaq qaammatisiutitini ullunik 14-inik qaangerneqarpat, akiligassiissutit akileraaruseriffimmut</p>

	akilersinniarneqartussanngorlugit tunniutissavaat.
<p><i>Imm. 8. Pissutsit imm. 1-7-imi taagorneqartunut tunngatillugu Naalakkersuisut maleruagassanik aalajangersaasinnaapput, ilanngullugit akileraaruserivimmut akiligassanik nuussinermi, nalinginnaasumik eqqaasitsissuteqartarnermi suleriutsimut minnerpaamik piumasaqaatit, akilersinniakkanik utertitsisarnerit, naafferartumik akilersorneqarnissamut imaluunniit akilinngikkallartinneqarsinnaasut akuerineqarsinnaasut pisassarisat annertussusiinut il.il tunngasut, aammalu naafferartumik akilersuinermi akiliinngikkallarnissamullu piffissaliussat pillugit malittarisassiat pillugit periutsit. Naalakkersuisut aamma akilersinniakkat elektronikkimik atortorissaarutit atorlugit tunniunneqarsinnaanerit pillugu malittarisassanik aalajangersaasinnaapput.”</i></p>	<p>11. § 11 a, imm. 8 imatut oqaasertalerneqarpoq: <i>Imm. 8. Pissutsinut imm. 1-imiit 7-imut taagorneqartunut tunngatillugu, tamatumani aamma akilersinniakkanik akileraaruserivimmut tunniussinermi periusissaq pillugu, nalinginnaasumik eqqaasitsissuteqartarnermi suleriutsimut minnerpaamik piumasaqaatit pillugit, akilersinniakkanik utertitsisarnermut, naafferartumik akilersorneqarnissamut imaluunniit akilinngikkallartinneqarsinnaasut akuerineqarsinnaasut pisassarisat annertussusiinut il.il tunngasunik, aammalu naafferartumik akilersuinermi akiliinngikkallarnissamullu piffissaliussat pillugit malittarisassanik Naalakkersuisut aalajangersaasinnaapput. Naalakkersuisut aamma akilersinniakkat elektronikkimik atortorissaarutit atorlugit tunniunneqarsinnaanerit pillugu malittarisassanik aalajangersaasinnaapput.”</i></p>
<p>§ 11 b. Pisassarisat akileraaruserivimmut akilersinniagassanngorlugit tunniunneqartut malittarisassat Naalakkersuisut aalajangigaat malillugit erniaqartinneqassapput. Naalakkersuisut tamatumani pisassarisanut assigiinngitsunut erniat annertussusissaat aalajangersarsinnaavaat aalajangersarlugulu erniat qanoq naatsorsorneqarnissaat.</p>	<p>12. § 11 b, imm. 1 imatut oqaasertalerneqarpoq: Pisassarisat akileraaruserivimmut akilersinniagassanngorlugit tunniunneqartut malittarisassat Naalakkersuisut aalajangigaat malillugit erniaqartinneqassapput. Naalakkersuisut tamatumani pisassarisanut assigiinngitsunut erniat annertussusissaat aalajangersarsinnaavaat aalajangersarlugulu erniat qanoq naatsorsorneqarnissaat.</p>
<p><i>Imm. 5. Imm. 3-mik atuinissamut Naalakkersuisut malittarisassaliorsinnaapput.</i></p>	<p>13. § 11 b, imm. 5 imatut oqaasertalerneqarpoq: <i>Imm. 5. Imm. 3-mik atuinissamut Naalakkersuisut malittarisassaliorsinnaapput.</i></p>

<p><i>Imm. 3.</i> Naalakkersuisut imm. 1 aamma 2-mi malittarisassat naammassineqarnissaannut erseqqinnerusumik malittarisassanik aalajangersaasinnaapput. Naalakkersuisut aamma pisassaqartuusut pisortanilu oqartussaasut allat elektronikki atorlugu atortorissaarutit atorlugit pisassaqartuusumut pineqartumut tunngatillugu akiligassanut kinguaattoorutit amerlassusaannik, aammalu pisassaqartunut allanut tunngatillugu akiligassanut kinguaattoorutinik peqarnerseq akileraarusersiviup paasissutissanik nalunaarsugaanut isersinnaanerannut malittarisassanik aalajangersaasinnaapput.</p>	<p>14. § 11 c, imm. 3 imatut oqaasertalernerqarpoq: <i>Imm. 3.</i> Naalakkersuisut imm. 1 aamma 2-mi malittarisassat naammassineqarnissaannut erseqqinnerusumik malittarisassanik aalajangersaasinnaapput. Naalakkersuisut aamma pisassaqartuusut pisortanilu oqartussaasut allat elektronikki atorlugu atortorissaarutit atorlugit pisassaqartuusumut pineqartumut tunngatillugu akiligassanut kinguaattoorutit amerlassusaannik, aammalu pisassaqartunut allanut tunngatillugu akiligassanut kinguaattoorutinik peqarnerseq akileraarusersiviup paasissutissanik nalunaarsugaanut isersinnaanerannut malittarisassanik aalajangersaasinnaapput.</p>
<p><i>Agguaanermut aalajangersakkat</i></p>	<p>15. § 11 c-p kingorna immikkoortumut qulequtaq “<i>Agguaanermut aalajangersakkat</i>” atorunnaarsinneqarpoq.</p>
	<p>16. § 11 d imatut oqaasertalersorneqarpoq: § 11 d. Kommunit akiliisitsiniarnermut tunngasutigut innuttaasunik sullissinerat pillugu sulianilu allagaatit allagaatinillu toqqortaatit qanoq annertutigisumik akileraaruserivimmut nuunneqarnissaat pillugu malittarisassanik Naalakkersuisut aalajangersaasinnaapput.</p>
	<p>17. § 11 e imatut oqaasertalersorneqarpoq: § 11 e. Allakkianik atsiorneqanngitsunik imaluunniit maskiinamik atsiorneri issuarneqarsimasunik imaluunniit taamaaqataanik periaaseqarfiusunik tunniussisarneq pillugu maleruagassanik Naalakkersuisut akiliisitsiniartarnermut suliassaqarfimmi aalajangersaasinnaapput, taamaalilluni allakkiaq taamaattoq inatsisitigoortumik allakkiamut inummit atsiorneqarsimasumut sanilliunneqarsinnaassalluni.</p>

	<p>18. § 11 f imatut oqaasertalersorneqarpoq: § 11 f. Akiligassiissutip aningaasartaasa sinnerat 100 koruuniuppat annikinneruppalluunniit, akileraaruseriffiup akiligassiissut akiligassiisumut utertillugu tunniussinnaavaa.</p> <p><i>Imm. 2.</i> Kommunalbestyrelsit aamma Naalakkersuisut akiligassiissutitik 100 koruuninik annikinnerusunilluunniit aningaasartallit akilerneqanngitsut isumakkeerniarlugit aalajangersinnaapput.</p>
	<p>19. § 11 f-ip kingorna immikkoortup qulequtaa “<i>Akiliisarnerit</i>” atorunnaarsinneqarpoq.</p>
	<p>20. § 11 g atorunnaarsinneqarpoq.</p>
	<p>21. § 12, imm. 3, imatut oqaasertalerneqarpoq: <i>Imm. 3.</i> Inatsisartu tinatsisaannit matuma malitsigisaatut najoqqutassani atuutsinneqalersuni pineqaatissiissutinik, akiliisitsissutitut ilusilinnik aalajangersaasoqarsinnaavoq.</p>
	<p>22. § 12-imi imm. 4-tut aamma 5-itut ilanngunneqassaaq: <i>Imm. 4.</i> Inatsisartut inatsisaat imaluunniit najoqqutassat Inatsisartut inatsisaat naapertorlugu aalajangersagaasut akiliisitsinissap aalajangersarnissaanut inatsimmi tunngavissaliisimappata, akiliisitsinissaq Kalaallit Nunaanni Pinerluttulerinermut Inatsimmi kapitali 5-imi maleruagassat malillugit ingerlatseqatigiiffiit il.il. (inatsisitigut pisinnaatitaasut pisussaatitaasullu) tutsinneqarsinnaavoq.</p> <p><i>Imm. 5.</i> Akiliisitsissutit Inatsisartut inatsisaat manna, imaluunniit Inatsisartut inatsisaata malitsigisaatut najoqqutassat atuutsinenqalersut malillugit akiliisitsissutaasut Nunatta Karsiata pisassarai.</p>
	<p>23. § 12 a, imm. 1 aamma 2 imatut oqaasertalerneqassapput:</p>

	<p>Akileraruseriviup naatsorsuutigippagu unioqutitsineq akiliisitaanermik sakkortunerusumik nassataqassanngitsoq, Naalakkersuisut, Naalakkersuisulluunniit tamatumunnga pisinnaatitaata, pineqartoq nalunaarfigisinnaavaa suliaq eqqartuussivikkut malersuinertaqanngitsumik aalajangiivigineqarsinnaasoq. Taamaattorli tamanna taamaallaat pisinnaavoq pineqartup unioqutitsinermit pisuunini nassuerutigippagu piffissallu erseqqinnerusumik taaneqartup, qinnuteqarnikkut kinguartinneqarsinnaasup, qaangiutinnginnerani, nalunaarummi akiliisitaassutissatut nalunaarutigineqartoq akilerniarlugu nalunaarutigalugu.</p> <p><i>Imm. 2.</i> Imm. 1-imi nalunaarummut oqaatigineqartumut tunngatillugu Kalaallit Nunaanni Eqqartuussisarneq pillugu Inatsimmi unnerluussutip imarisassai pillugit malittarisassat taamatuttaaq matumani atuupput.</p>
<p>§ 12 b. Malittarisassani, Inatsisartut inatsisaat manna malillugu pilersinneqartuni, aalajangersakkanik unioqutitsinermit akiliisitaanermik pineqaatissiinermit malittarisassat aalajangersarneqarsinnaapput.</p> <p><i>Imm. 2.</i> Malittarisassani Inatsisartut inatsisaat manna malillugu pilersinneqartuni, aktiat anpartilluunniit tunngavigalugit ingerlatseqatigiiffimmit, piginneqatigiiffittut ingerlatsivimmit, peqatigiiffimmit, imminut pigisutut suliffeqarfimmit, aningaasaateqarfimmit, naalagaaffimmi oqartussaasunit, Kalaallit Nunaanni Namminersornerullutik Oqartussanit, kommunemit, kommunit ataatsimooqatigisaannit assigisaannillu unioqutitsinerit akiliisitaanermik pineqaatissiissutigineqarnissaannut malittarisassat aalajangersarneqarsinnaapput.</p>	<p>24. § 12 b aamma 12 c atorunnaarsinneqarput.</p>

<p>§ 12 c. Akiliisitaassutit §§ 12-12b naapertorlugit akiliisitsissutaasut nunap karsiata pisassarai.</p>	
<p>§ 13. Inatsisartut inatsisaata piffissaq atortuulorfissaa Naalakkersuisut aalajangersassavaat.</p> <p><i>Imm. 2.</i> §§-it 2, 3, 5 aamma 7 akiligassiissutitut Inatsisartut inatsisaata matumap atortuulersinneqaneraniit ukiut tallimat sioqqullugit pisoqaassuseqartunut taakkuninngaluunniit kingusinnerusukkut pilersimasunut atuutissapput.</p> <p><i>Imm. 3.</i> § 6-imi akiligassiissutit pineqartut Inatsisartut inatsisaata ullormi atortuulersinneqaneraniit tassangaluunniit kingusinnerusukkut pilersimasunut atuutissaq.</p>	<p>25. § 13 imatut oqaasertalerneqarpoq: § 13. Naalakkersuisut Inatsisartut inatsisaata atuutilerfissaa aalajangersassavaat.</p>
	§ 2
	Inatsisartut inatsisaat ulloq 1. januar 2025 atuutilissaaq

Ilanngussaq 2**Tusarniaanermut akissuteqaatit pillugit allakkiaq**

Siunnersuut pillugu makkuninnga tusarniaanermut akissuteqaat tiguneqarpoq: Meeqqanut Inuusuttunullu Naalakkersuisoqarfik, Sulisitsisut, Grønlandsbanken, Inuusutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfik, SISA Soraarnerussutisiassat, Naalagaaffimmi Politiit, SIK, Ilinniagartuut Kattuffiat – Kalaallit Nunaanni Ilinniagartuut Kattuffiat, Nunatta Eqqartuussivia.

Tusarniaaffigineqartut makkua siunnersuummut oqaaseqaateqarlutik tusarniaanermut akissuteqaammik nassiussippot: Sulisitsisut, Grønlandsbanken, Inuusutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfik, SIK, Ilinniagartuut Kattuffiat – Kalaallit Nunaanni Ilinniagartuut Kattuffiat.

Matuma kinguliani tusarniaaffigineqartut oqaaseqaataanni immikkoortut pingaarnertit nalinginnaasumik allannilerlugit issuarneqarput, Naalakkersuisuniit oqaaseqaatit *uingasumik allannilerlugit* allassimallutik.

Sulisitsisut ataatsimut isigalugu inatsisissatut siunnersuummut tunngatillugu oqaatigaat, siunnersuut akiliisitsiniartarnermut maleruagassanik sukaterinertut isigineqartoq, taamaattumik – aammaarluni – pisortanut akiitsunik akilinngitsuukkanik ilanngaatiginnilluni akiliisitsiniarsarilinninnermi akiliisitsiniarnissamut ilanngaatiginninnissamullu tunngavissat nakkutigilluarneqassasut, oqartussanut uparuarnissaa pisariaqarsoralugu. Sulisitsisut taamaalillutik eqqortumik tunngavilimmik ilanngaatiginnittoqartanngitsoq, suliassani aalajangersimasuni arlalinni paasisimavaat, tamannalu arlaleriarluni oqartussanut sumiissusersisarsimallugu.

Tusarniaanermut akissuteqaat allanngortitsinissamut pissutissaqalersitsinnigilaq. Tusarniaanermut akissuteqaat siunnersuummut attuumassuteqartutut isigineqanngilaq. Siunnersuummi pisortanut akiitsut akilersinniartarnerat pinaveersaartinneqarnissaallu pillugit Inatsisartut inatsisaanni allanngortitsinerit taamaalillutik ilanngaatiginnittarnermut maleruagassanik, eqqartuussivinni suleriaatsini maleruagassiivigineqartunik, allanngortitsinnigillat.

Akileraaruseriffik Sulisitsisunit saaffiginnissuteqarneq tunngavigalugu ilanngaatiginnittarnermut suleriaatsimik arlaleriarluni iluarsisarsimavoq, taamatullu allakkanut najoqqutassani akiliisitsiniartarnermilu periaatsip aaqqissugaanerani iluarsisarsimalluni. Allakkanut najoqqutassat taamaalillutik paasiuminarninngorlugit aammalu paasissutissanik arlalinnik imaqartilerlugit allanngortinneqarput, ilanngullugit akiligassiissutinut pineqartunut tunngatillugu. Akiliisitsiniartarnermut periaaseq ilaatigut iluarsineqarpoq, taamaalilluni akiligassiissutit tiguneqarneranniit ilanngaatiginnissinnaalernissamut imaluunniit akiliussigallarnissamut kinguartitsineq ilanngunneqarluni. Siunnersuummi § 1, nr. 10 taamaaqataanik iluarsineruvoq,

taamaaqataanik siunertaqartoq, tassami kommunit akiligassiisutaannut tunngatillugu akiliinissamut piffissamut killigittitap aammalu akiligassiisutip akileraaruseriffimmut nassiunneqarnissaata akornanni ullunik 14-inik piffissaliineq ilanngunneqassasoq siunnersuutigineqarpoq.

Sulisitsisut ilaasortaasa eqqunngitsumik tunngavilimmik ilanngaaticinnittoqartartoq misigisarsimappassuk, tamanna soorunami tulluannigilaq. Suliffeqarfik ilanngaaticinninnissaq pillugu aalajangiinermut isumaqataanani pisoqassagaluarpat, taanna akileraaruseriffimmut akerliliissuteqarsinnaavoq, pisariaqarpallu Aningaasaqarnermut Akileraartarnermullu Naalakkersuisoqarfimmut ingerlatsiviup aalajangiinera naammagittaalliuutigisinnaallugu.

Grønlandsbankip ataatsimut isigalugu inatsisissatut siunnersuummut oqaatigaa, inatsisissatut siunnersuut eqqartuussisarnermut inatsimmi atsiorderit pillugit aalajangersakkanik iluarsaassinissamut periarfissatut isigineqartoq, taamaalilluni pappialami digitalimillu atsiorderit imminnut sanilliunneqarsinnaalissallutik. Ilangullugu oqaatigineqarpoq, tamanna inatsisissatut siunnersuummi pisortani akiliisitsiniarnermut oqartussani sunniuteqarluarnerulersitsinissamik siunnerfeqarneratuulli, taamaaqataanik namminersortut akiligassiisartut akiliisitsiniarnissamut periarfissaqarnerannik oqinnerulersitsissasoq sunniuteqarluarnerulersitsissasorlu.

Tusarniaanermut akissuteqaat siunnersuummut attuumassuteqartutut isigineqanngilaq. Taamaattoq tusarniaanermut akissuteqaat aalajangersakkanut ataasiakkaanut nassuiaatinik erseqqissaanissamut pissutissaqalersitsivoq, tassami siunnersuummi siunnerfigineqartoq tassaasoq, pisortat ingerlatsineranni allakkiat atsiorneqarsimanissaat pillugu pisortat ingerlatsinerannut inatsisini piumasaqaammi ilaatitsinnginnissamut piginnaatitsisoqarnissaa, erseqqissarnissaa Naalakkersuisut tulluarnerpaatissimavaat.

Inuussutissarsiornermut, Niuernermet, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfik makkuninnga oqaaseqaateqarpoq:

Najukkani aatsitassanut tunngasunik suliaqarnek pillugu Inatsisartut inatsisaat siunnersuummi § 1, nr. 1-imi ilanngunneqartariaqaraluartoq.

Siunnersuut iluarsineqarpoq.

Siunnersuutigineqartumi § 1, nr. 1-imi immikkoortoq 25 allanngortinneqartariaqaraluarpoq imatut “Unammilleqatigiinneq pillugu Inatsisartut inatsisaat”.

Siunnersuut iluarsineqarpoq.

Inuussutissarsiornermut, Niuernermut, Aatsitassanut, Inatsisit Attuutinneqarnerannut Naligiissitaanermullu Naalakkersuisoqarfiup tamatuma saniatigut Atuisartoqarnermut Unammilleqatigiinnermullu Aqutsisoqarfimmiit oqaaseqaatit makkua ingerlateqqippai:

Atuisartoqarnermut Unammilleqatigiinnermullu Aqutsisoqarfiup oqaatigaa, siunnersuummi akiligassiissutit aalajangersimasut akileraaruseriffimmut nuutinneqarnerat, pisortatigoortumik inatsisitigut isumannaatsuunermut ajornartorsiutaasinnaasoq. Taamaattoq akiitsoqartup pissusiviusuni inatsisitigut inissisimanagera allanngortussaannngitsoq takuneqarsinnaavoq, tassami akileraaruseriffik eqqartuussisarnermut inatsimmi inatsisitigut isumannaatsuutitsinissamut piumasagaammi sulii pineqartunut ilaasussaammat, ilanngullugu pisariaqartitanik atugassaqartinneqarnissaq.

Tusarniaanermut akissuteqaat siunnersuummi nassuiaatini nalinginnaasuni erseqqissaanissamut pissutissaqalersitsivoq, tassami akiliisitsiniartarnermut suliaasaqarfimmi inatsisitigut sinaakkutissat pillugit immikkoortoq aallarniutaasoq ilanngunneqarmat. Tassunga ilanngullugu ilassutigineqarpoq, akiliisitsiniarnissamut piginnaatitaanerup akiliisitsiniarnermut oqartussamut tunniunneqartarneranut ilusiliami, aamma nunani allani takuneqartartumi, eqqartuussiviit ikiorniarnissaannik siunertarineqarmat. Tamanna pingaartumik akiliisitsiniarnissamut tunngavissat qularutigineqaratik suliaasani atuuppoq. Taamaakkaluartoq akileraaruseriffimmut akerliliissuteqartoqarnerani, akileraaruseriffiup akerliliissuteqarneq Kalaallit Nunaannut eqqartuussisarnermut inatsimmi § 609, imm. 1 naapertorlugu eqqartuussivimmu suliaakkiissutigisussaavaa.

Naalakkersuisut taamaalillutik Atuisartoqarnermut Unammilleqatigiinnermullu Aqutsisoqarfiup inerniliussaa isumaqatigaat, tassami akiliisitsiniartartut piumasagaatit eqqartuussisarnermut inatsimmiittut malittussaavaat, ilanngullugu pisariaqartitanik atugassaqartinneqarnissaq. Tassunga ilanngunneqarsinnaavoq, siunnersuummi inatsisitigut inissisimanagera atuuttoq, akileraaruseriffimmut akiliisitsiniarnissamut piginnaatitsineq atituumik nammineerfiussamik imaqaareersoq, malunnaatilimmik allanngortinneqartussaannngitsoq naliliisoqarmat. Taamaattumik siunnersuummi, nassuiaatini allani taaneqartutut, akileraaruseriffiup akiliisitsiniarnissaata ingerlanissaanut periarfissaareersut annertusitinneqaannarput, kisianni pisortatigoortumik piumasagaatit suliaasaqarfimmi eqqartuussivinnut taamatullu pisortat ingerlatsivianni oqartussamut piumasagaataasut atuutiinnarlutik.

SIK-p oqaatigaa nunatsinni SIK-mut isumaqatigiissutit ataanni sulisorpassuit isertitakitsut siunnersuummi nr. 3-mut, aningaasarsiat amerlanaarlugit tunniunneqartut utertillugit akilernerqartarnerannut (condictio indebiti) tunngassuteqartumut, atatillugu ilungersunartorsiulertussaasut. Pisortani sulisitsisup kukkusumik sulisumut aningaasarsiat amerlanaarlugit tunniussinerani, tamatumalu kingorna piumasagaatip akileraaruseriffikkoortumik akilersinniarneqalernerani, piumasagaat pilertarpoq. SIK-p tusarniaanermut akissuteqaammi

siunnersuutigaa, aningaasarsianik amerlanaarlugit tunniunneqarsimasunik utertillugit akiliinissaq naafferartumik akilersuinikkut pisinnaalerlugu, aaqqissuussisoqassasoq. Tamatumani isertitakitsut inuuniarnissamut aammalu aningaasartuutit pisariaqartut, soorlu ineqarnermut akiliut, kiassarneq, innaallagiarneq inuussutissallu, matussusernissaannut periarfissinneqassapput, taamaalillutillu ilaqutariit inuuniarnermut aningaasartuuteqaannassallutik. Tamatumani erseqqissarneqarpoq aaqqissuussineq nutaaq taanna sulisitsisumut akilersuinissamik aaqqissuussinissamut periarfissamik maannakkut atuuttumik ajornerulersitsissanngitsoq.

Tusarniaanermut akissuteqaat allannortitsinissamut pissutissaqalersitsinnigilaq. Siunnersuummi isertitakitsunut tunngatillugu inatsisit atuuttut allannortinneqassannigilat. Taamaalilluni illuatungeriit akileraaruseriffik akiliutsinnagu akilersuinissamut aaqqissuussinermik isumaqatigiissuteqarsinnaanerat allannortinneqannigilaq. Tamatuma saniatigut akileraaruseriffiup akiliisitsiniarnermik suliaqarnermini akiitsullip akiliisinnaassuseqarnera sillimaffigisussaagaa (Kalaallit Nunaannut eqqartuussisarnermut inatsimmi § 618-imi pisariaqartitanik atugassaqartinneqarnissaq) allannortinneqannigilaq, tamannami pingaartumik isertitakitsunut attuumassuteqarpoq. Akileraaruseriffiup taamaalilluni sulinermini akiitsullip ineqarnermut akiliummut, kiassarnermut, innaallagissamut inuussutissanullu aalajangersimasumik atugassaqartinneqartussaanaera, suli sillimaffigisartussaavaa. Tamanna siunnersuummi allannortinneqartussaannigilaq. SIK-p siunnersuutaa taamaattumik suliaassarfimmi suleriaatsimut atuutereersumut naapertuuppoq.

Ilinniagartuut Kattuffiat – Kalaallit Nunaanni Ilinniagartuut Kattuffiata oqaatigaa, inatsisissatut siunnersuummi § 1, nr. 4 (kingusinnerusukket nr. 3-nngorlugu allannortinneqartoq) isumanerluuteqarfigineqartoq. IK/ASG-p tikkuarpaa allannortitsinermi aningaasarsianik amerlanaarlugit tunniunneqarsimasunik utertillugit akiliinissaq pillugu sulisut inatsisitigut pisinnaatitaanerat sunnerneqarsinnaasoq. Inatsisini maannakkut atuuttumi naleqqunnersoq naliliinermi sulisut upperinnillutik inissisimanerannik illersorneqarput, aammalu illersuinerup taassuma inatsisissatut siunnersuummi nutaami atuutsiinnarneqarnissaa IK/ASG-p kissaatigaa. Tusarniaanermut akissuteqaammi siunnersuutigineqarpoq, sulisup pitsaanngitsumik isumaqarluni aningaasat tigusimappagit aammalu utertillugit akilerneqarnissaat isumaqatigalugu nalunaaruteqarluni. Taamaanngippat sulisoq akiliisitsiniarnermut akerliliissuteqarsinnaasoq, tamatumalu kingorna piumasaqaat eqqartuussivinnut suliakkiissutigineqassasoq, erseqqissarneqartariaqaraluarpoq.

Tusarniaanermut akissuteqaat siunnersuummi aalajangersakkanut ataasiakkaanut nassuiaatini erseqqissaanissamut pissutissaqalersitsivoq. Kalaallit Nunaannut eqqartuussisarnermut inatsimmi § 609, imm. 1 naapertorlugu akiitsoqartup akileraaruseriffiup akiliisitsiniarneranut akerliliissuteqarnera eqqartuussivimmu suliakkiissutigineqassasoq, IK/ASG-mit tusarniaanermut akissuteqaat tunngavigalugu conditio indebiti pillugu immikkoortumi aamma erseqqissarneqarpoq.